



FONDACIJA  
HASTOR

FONDACIJA  
HASTOR

*Obrazovanje - izbor pobjednika!*

# Godišnji izvještaj 2023/2024.





# Sadržaj

1.	UVODNA RIJEČ	3
2.	O NAMA	4
3.	FONDACIJA HASTOR U BROJKAMA	5
4.	PUNOLJETSTVO AKTIVNOG DJELOVANJA FONDACIJE HASTOR	7
5.	PROCES ODABIRA STIPENDISTA	8
6.	MODEL VOLONTIRANJA FONDACIJE HASTOR	10
7.	NAJZNAČAJNIJI DOGAĐAJI U 2023/2024. GODINI	24
8.	PODCAST FONDACIJE HASTOR	39
9.	MENTORSKI PROGRAM	40
10.	USPJESI STIPENDISTA	41
11.	VANNASTAVNE AKTIVNOSTI STIPENDISTA	44
12.	PREDSTAVLJANJE DIPLOMANATA I MAGISTRANATA 2023/2024	48
13.	IZJAVE STIPENDISTA I BIVŠIH STIPENDISTA	52
14.	KLUB PRIJATELJA	54
15.	PRIDRUŽITE NAM SE	55



## UVODNA RIJEČ



Kraj godine uvijek je prilika da se osvrnemo na sve dosadašnje uspjehe i napretke naše Fondacije Hastor pa je tako Godišnji izvještaj već godinama prilika da sačuvamo i sublimiramo male korake koji su nas vodili do velikih uspjeha. Sve ovo vrijeme sačuvali smo međusobnu povezanost naših alumnista i stipendista kroz ljubav prema Fondaciji koja iz dana u dan samo raste i biva snažnija, a sve to rezultira pričama koje nastojimo podijeliti i s drugima, kako bi bile inspiracija, vodeći se rečenicom naših osnivača da se svjetlo dobrote ne gasi nikada ako svoj plamen dijelimo s drugima.

Nekoliko stranica koje će se naći ispred vas pisali smo proteklih godinu dana, djelima mnogo više nego riječima, i na taj način dokazali zašto je Fondacija Hastor još uvijek jedna od najvećih fondacija u Bosni i Hercegovini, ali i regionu, koja svojim konstantnim radom unapređuje ne samo djelovanje svojih stipendista već i društva u kojem ovi mladi ljudi izrastaju. Da naš rad ima svoje itekako prepoznatljive rezultate dokaz je proteklih 18 godina koje su iza nas i koje su obilježene velikim brojem dodijeljenih stipendija, volonterskih sati, humanitarnih i ekoloških akcija, izmamljenih osmijeha i sklopljenih prijateljstava po kojima smo prepoznatljiviji. Dobra, ljubavi i podrške u svojoj zajednici.

S ponosom možemo kazati da je u ovoj godini zaživio novi model volontiranja koji je dao odlične rezultate te su naši stipendisti, na čiji napredak je i usmjerena izvorna ideja novog modela volontiranja, povećali svoja znanja i iskoristili iskustva svojih mentora. Na ovaj je način volontiranje u Fondaciji Hastor, kao naša najprepoznatljivija komponentna, našim stipendistima pružilo mogućnost građenja temelja za svjetliju i uspješniju budućnost. Ovim načinom volontiranja pomogli smo našim stipendistima u ostvarivanju boljih rezultata u nastavnim i vannastavnim aktivnostima, međusobno smo gradili jače veze prijateljstva i povjerenja, ali i razvijali kreativnost i stjecali nova znanja i iskustva. Ovu godinu

obilježilo je i uvođenje novog programa podrške nadarenim/talentovanim učenicima s prostora Bosne i Hercegovine koji su zahvaljujući izvanrednim uspjesima iz polja umjetnosti, sporta i nauke dobili priliku da budu stipendisti Fondacije Hastor i na taj način uz brojne titule koje imaju dobiju i ovu. Zadovoljstvo je kazati kako je Fondacija Hastor po ko zna koji put potvrdila svoju misiju građenja lidera i kreiranja prilika zahvaljujući kojima će mladi ljudi naše zemlje imati uslove i želju da ostanu u Bosni i Hercegovini i ovdje grade svoje porodice i karijerne puteve. To smo potvrdili i kroz još jedan od noviteta koji je početak jedne izvanredne priče o čijim ćemo rezultatima i benefitima govoriti u budućnosti. U ovoj godini Fondacija Hastor pokrenula je realizaciju mentorskog programa pod nazivom "Prvi korak u poslovni svijet" kroz koji će studenti stipendisti imati jedinstvenu priliku dobiti mentorsku podršku ostvarenih stručnjaka iz oblasti srodnih oblastima njihovih studija ili onoga za što žele da bude njihovo zanimanje budućnosti čime se nastoje jačati kompetencije potrebne za tržište rada i osnažiti mlade u njihovom nastojanju da postanu samosvjesni lideri u svojim zajednicama.

Osvrćući se na postignuća i napretke koje smo zajednički gradili u prethodnoj godini, ne mogu da ne spomenem aktivnosti Alumni kluba Fondacije Hastor koji je aktivno radio na planiranju i realizaciji budućih aktivnosti s ciljem širenja pozitivnih priča i primjera u našem društvu. Na ovaj se način, kroz djelovanje Alumni kluba Fondacije Hastor, po ko zna koji put potvrđuje kako znanja i iskustva koja naši stipendisti ponesu još kao učenici i studenti u njima ostaju usađena i nastavljaju ih širiti u zajednicama u kojima djeluju.

U konačnici, s iznimnim ponosom mogu reći kako su brojke koje 18 godina uspješno brojimo, preko 2.000.000 volonterskih sati i više od 26.000 dodijeljenih godišnjih stipendija, dokaz da pozitivne priče kakva je priča Fondacije Hastor traju i rastu gradeći prije svega dobre i obrazovane mlade ljude, ali i pozitivno okruženje za dolazak novih generacija.

Stranice koje će se naći ispred vas ispisane su pozitivnim pričama i ostvarenim željama i samo su dio pozitivne atmosfere koja je vladala u našoj Fondaciji proteklih godinu dana te se nadam da ćete u njima pronaći inspiraciju i motivaciju da činite dobra djela i lijepe geste te širite plamen dobra, ljubavi i podrške u svojoj zajednici.

*Lejla Donlagić*

Direktorica Fondacije Hastor



# O nama

Fondacija Hastor je neprofitna organizacija koja svojim djelovanjem na području gotovo čitave Bosne i Hercegovine od 2006. godine aktivno učestvuje u osnaživanju mladih ljudi koji su pokretači pozitivnih promjena u svojim lokalnim zajednicama, ali i u čitavoj državi. Od 2006. godine, kada je počela s radom, Fondacija pod svoje okrilje uzima perspektivne i talentirane mlade osobe, kao i one koje dolaze iz socijalno ugroženih porodica, kako bi svima pružila jednaku priliku za obrazovanje. Fondacija Hastor prati učenike već od školskih klupa pa sve do amfiteatarskih stolica na fakultetima i prvih zaposlenja, što je čini jedinstvenom fondacijom na ovim prostorima koja u kontinuitetu obezbjeđuje podršku učenicima i studentima.

U trendu masovnog odlaska mladih ljudi u druge države, zahvaljujući svom programu stipendiranja i mentorstva, već 18 godina mladim ljudima pružamo perspektivu unutar naše države te im dajemo priliku da razvijaju svoje potencijale i učestvuju u unapređenju lokalnih zajednica. Na taj način gradimo uspješne mlade ljude, stvaramo nove lidere i jačamo Bosnu i Hercegovinu. Hiljade smo mladih ljudi, naših bivših stipendista, uspješno pripremili za životne, samim time, i poslovne izazove, profilirajući ih kroz podršku njihovom formalnom obrazovanju te volonterizam pod našim okriljem da revnosno nastave širiti vrijednosti i misiju Fondacije Hastor. Ponosni smo na to što danas možemo vidjeti naše bivše stipendiste kao dobre, empatične i uspješne mlade ljude u ulogama asistenata na fakultetima, profesora, direktora, HR menadžera, IT stručnjaka, doktora, kao i osnivača i vlasnika kompanija.

Kroz Fondaciju Hastor prošle su generacije uspješnih i mladih osoba koje su sada izgrađene ličnosti s uspješnim profesionalnim i porodičnim životima, što, na neki način, predstavlja i uspjeh same Fondacije. Ono što je zajedničko svakom stipendisti Fondacije Hastor jeste izgrađen osjećaj za pomaganje drugima i svojoj lokalnoj zajednici te osjećaj za odgovornost koja je izuzetno važan segment koji svaka mlada osoba mora spoznati. Pomaganje se najviše ispoljava kroz razrađen i precizno uređen sistem volontiranja koji stipendiste različitog uzrasta usmjerava ka najboljim načinima za lični

razvoj i boljitak njihove lokalne zajednice. Svaki stipendista Fondacije Hastor jednako je važan jer svaki od njih daje doprinos cjelokupnom bosanskohercegovačkom društvu. Kao vrijedni mravi koji konstantno rade za svoj mravinjak, tako i stipendisti Fondacije Hastor svojim malim koracima poboljšavaju svoje lokalne zajednice pa čak i cijelu državu čineći je pristupačnijom i perspektivnijom za sve njene građane.

**Od početnih tri stotine stipendista, Fondacija Hastor u školskoj i akademskoj 2023/2024. godini broji više od 2.300 stipendista koji svojim volonterskim angažmanima oplemenjuju sebe i daju nadu u bolju budućnost u Bosni i Hercegovini.**





# Fondacija Hastor u brojkama

**388**

SUPERODLIKAŠA

**583**

ODLIKAŠA

**NAŠE BROJKE U  
2023/2024.**

**75**

DIPLOMANATA

**42**

MAGISTRANATA

**VIŠE OD  
2.300**

STIPENDISTA



**NAŠ RAST  
KROZ GODINE**

**135** OPĆINA

**600** OBRAZOVNIH INSTITUCIJA

**VIŠE OD  
26.000** DODIJELJENIH  
GODIŠNJIH STIPENDIJA

**PREKO  
2.000.000** VOLONTERSKIH SATI



# Punoljetstvo aktivnog djelovanja Fondacije Hastor

U osvrtu na osamnaestu godišnjicu utkane su niti za unapređenje zajednice, širenje altruizma i безусловne ljubavi. Fondacija Hastor kroz filantropske programe i inicijative kontinuirano doprinosi društvenom razvoju i jačanju međuljudskih odnosa. Posvećenost stipendista prožeta je duhom nesebične solidarnosti. Fondacija Hastor promiče altruizam i prakticira ga u svakom koraku svog rada, čineći ga vidljivim i snažnim.

Osamnaestu godišnjicu obilježili smo u aprilu 2024. godine, a novi početak otvara vrata brojnim prilikama. Angažman Fondacije Hastor odražava se kroz izvanredne rezultate istaknute kroz podršku hiljadama mladih, kako bivših tako i sadašnjih stipendista. Njihovo obrazovanje podupiremo s ciljem stvaranja narativa koji ističe društveni i lični napredak, čime doprinosimo izgradnji inkluzivne budućnosti.

Volonterizam je ključ našeg djelovanja. Stipendisti Fondacije Hastor istakli su se svojom posvećenošću društvenim inicijativama, doprinoseći ukupnom volonterskom angažmanu preko 2.000.000 sati. Kroz godine, Fondacija Hastor postala je simbol zajedništva i socijalne odgovornosti. Dodijeljeno je više od 26.000 godišnjih stipendija, čime se ostvaruje značajan doprinos obrazovanju. Fondacija Hastor je porodica – živi aspekt pripadnosti koji nas uzajamno povezuje.

Kroz proteklih 18 godina, Fondacija Hastor postala je sinonim za potporu i nadu mladim ljudima širom zemlje. Zbog toga su stipendisti djelotvorna snaga koja pokreće promjene. Njihova srdačnost, posvećenost i entuzijizam osiguravaju da svaki napor predstavlja korak ka unapređenju budućnosti.

Kroz volonterski angažman stipendisti imaju priliku istraživati različite aspekte života, razvijati jedinstvena iskustva koja će im obogatiti svjetonazore i omogućiti razvoj ličnih potencijala. Fondacija Hastor nudi mogućnost međusobnog učenja i zajedničkog napretka. Svojim djelovanjem Fondacija gradi mostove jednakih prilika i oblikuje budućnost cijele zajednice. Uspješnost navedene misije odražava se kroz životni put

naših vrijednih stipendista. Fondacija promiče vrijednosti koje uključuju društvenu odgovornost i pozitivne promjene. Utjecaj Fondacije Hastor vidljiv je na svim nivoima zajednice, od pojedinaca do institucija, što je rezultat kontinuirane predanosti principima jednakosti, pravde i obrazovanja.

**U svakom koraku njenog djelovanja uočavamo priče o hrabrosti, predanosti i vjeri. Fondacija Hastor pruža značajnu podršku mladim ljudima, omogućavajući im prilike za napredak. Potiče stipendiste da teže ka svojim ciljevima. Njihovi uspješni snovi svjedoče o moći obrazovanja kao temelja za buduća postignuća. Kroz proteklih 18 godina, Fondacija Hastor s predanošću je gradila i nastavlja graditi inspirativne priče mladih stipendista koje služe kao izvor motivacije.**





# Proces odabira stipendista

Fondacija Hastor jedina je organizacija u Bosni i Hercegovini koja tokom cijele godine prima molbe za stipendiranje učenika osnovnih i srednjih škola. Molbe sadrže osnovne podatke o kandidatima (kontakt, kratak opis socioekonomskih uvjeta u kojima žive te informacije o školovanju) i mogu se pronaći na web-stranici Fondacije Hastor, kao i poslati pismeno putem pošte. Obrada pristiglih molbi vrši se jednom godišnje, u periodu februar/mart, nakon čega se kandidatima šalje zahtjev koji trebaju popuniti zajedno s pratećom dokumentacijom koja može posvjedočiti o iskazanoj ekonomskoj situaciji i ostvarenom školskom uspjehu. Na osnovu poslane dokumentacije Komisija boduje kandidate te oni koji ispunjavaju uslove prolaze u naredni krug. Tim Fondacije Hastor posjećuje kandidate s najvećim brojem bodova. Tek nakon izvršene provjere stanja na terenu, stipendije se dodjeljuju određenom broju kandidata, u ovisnosti od predviđenog budžeta za datu školsku godinu.

Studenti mogu postati stipendisti Fondacije Hastor ukoliko Fondacija objavi javni konkurs za prijem novih studenata. Konkurs za studente objavljuje se krajem godine, a prijavljivanje na konkurs vrši se isključivo online prijavom. Kandidati s najvećim brojem bodova bivaju pozvani na intervju s članovima Komisije za odabir stipendista.





## PROCES ODABIRA STIPENDISTA



**3138**  
PRISTIGLIH  
MOLBI

1



PREGLED  
MOLBI

2



**1132**  
PRISTIGLIH  
OBRAZACA

3



OBILAZAK **420**  
KANDIDATA S NAJVEĆIM  
BROJEM BODOVA

5



1. ZASJEDANJE  
KOMISIJE ZA DODJELU  
STIPENDIJA

4



2. ZASJEDANJE  
KOMISIJE ZA DODJELU  
STIPENDIJA

6



PRIJEM **368**  
NOVIH STIPENDISTA

7



# Model volontiranja Fondacije Hastor

## Mentorstvo kao osnovna komponenta volontiranja

*Mentor je osoba koja u vama vidi više talenata i sposobnosti nego što ih vi sami u sebi vidite i pomaže vam da te talente počnete koristiti.*

Fondacija Hastor obiluje ambicioznim, iskusnim i smjelim mladim ljudima koji svoje vještine pokazuju kroz ulogu mentora. Sastanci koje imaju priliku voditi svaki mjesec predstavlja im odličnu podlogu za razvijanje raznovrsnih vještina, stjecanje novih znanja i iskustva te ono što je možda i najbitnije, pružaju im mogućnost da pozitivno utječu na stipendiste s kojima obavljaju svoje volonterske sastanke. Mentori su tu da mladim stipendistima pruže stručne savjete i da ih podrže u njihovom profesionalnom ili ličnom razvoju. Na taj način učenici kroz mentorski program imaju jedinstvenu priliku za napredak kroz: usvajanje korisnih znanja i vještina, ostvarivanje boljeg uspjeha u školi zahvaljujući redovnoj podršci u učenju, jačanje vještina važnih za upis na više nivoe obrazovanja, unapređenje mentalnog zdravlja kroz izgradnju stabilnog odnosa s mentorima i sl.

Veliki broj naših studenata mentora je u protekloj godini nesebično doprinosa razvoju učenika i pružao im višestruku podršku, a u nastavku ćemo spomenuti samo neke od njih. **Almina Ibrahimović** dolazi iz Srebrenice, studentica je Farmaceutskog fakulteta Univerziteta u Sarajevu, a dio je velike porodice Fondacije Hastor već četiri godine. Almina je ove godine u Fondaciji volontirala kao mentorica učenicama Srednjoškolskog Centra za slijepu i slabovidnu djecu Sarajevo. Naime, njena grupa sastojala se od tri vrijedne, marljive i za svaki tip saradnje otvorene učenice. Na sastancima su obično obrađivale teme koje su najvećim dijelom namijenjene razvijanju svijesti te, prvenstveno, prilagođene njihovom uzrastu. Almina je istakla koliko svakim novim volonterskim sastankom uviđa važnost svoje uloge mentora u životu mladih ljudi. Uviđa i to koliko oni međusobno utječu jedni na druge i koliko uče i unapređuju se zajedno. Kako kaže, to je motiviše da nastavi razvijati svoje vještine i prenositi ih na mlađe generacije, sretna što joj Fondacija Hastor pruža takvu priliku:

*Fondacija Hastor je u mom životu i školovanju napravila veliku prekretnicu. Kroz Fondaciju i volonterske aktivnosti otkrila sam dosta novih stvari, upoznala zaista mnogo divnih ljudi, a neki od njih svakako su i moje mentorice koje su me provele kroz srednjoškolsko obrazovanje.*

Naši mentori kroz svoje volontiranje uvijek nastoje obilježiti sve ono što je značajno: pomaganje drugima i podsjećanje na ljudske vrijednosti koje ne smiju biti bačene u zaborav. S tim u vezi, **Elma Karić** i **Džeraldina Buljurina** odlučile su sa svojim volonterskim grupama obilježiti pink oktobar, mjesec svijesti o raku dojke, nizom aktivnosti. Elma i Džeraldina dolaze iz Busovače i volontiraju s dvije grupe učenika – sa srednjoškolcima i osnovcima. Volontiranje sa srednjoškolcima upotpunili su izradom vrpce te su pored toga organizirali mirnu šetnju kao simbol podrške ženama oboljelim od raka dojke. Pored toga, radili su i na osmišljavanju i dizajniranju plakata koji će krasiti školske hodnike. Plakati su nosili snažne poruke podrške i isticali važnost redovnih pregleda i saosjećanja s oboljelima. **Amila Brkić**, jedna od mladih stipendistica, podijelila je svoje iskustvo:


*Ova aktivnost mi je pomogla da razumijem koliko je važno razgovarati o raku dojke i o tome kako možemo pomoći drugima. Ponosna sam na to što sam dio ove priče.*

Narednu volontersku grupu prevode dvije mentorice – **Samra Đuderija** i **Zana Beljuri**, dvije izuzetno vrijedne djevojke koje vrlo vješto i pažljivo spremaju sastanke za svojih 13 srednjoškolaca. Jedan od njihovih sastanaka započeo je temom koja se tiče aktivizma i uloge mladih u društvu kao i važnosti formalnog i neformalnog obrazovanja za budućnost. Vođene time, odlučile su da se radionica sastoji od malih štandova na kojima će biti predstavljeni određeni kursevi, koji su osmišljeni tako da učenicima donosu nova znanja kojim će se poslužiti u praksi: kurs slikanja i crtana, kurs hirurškog šivanja i kurs *embroidery art*. Ovom prilikom zajedničkim snagama naši vrijedni stipendisti izvezli su i ime Fondacije Hastor. Mentorice su navele da su učenici bili pozitivno iznenađeni pripremljenim te da smijeh i priča nisu izostali.



*Na radionici sam naučila kako da uradim hirurški vez, što je bilo vrlo zanimljivo i korisno iskustvo. Bilo je edukativno i inspirativno vidjeti kako male promjene mogu napraviti veliku razliku u životima drugih, učenica **Mediha Hećimović** odlučila je podijeliti svoje iskustvo sa nama.*

Svjedoci smo da danas na svijetu postoji bezbroj teških i zahtjevnih uloga, a jedna od njih je i uloga mentora. Biti nečiji mentor odnosno, pratiti nekoga aktivno, ukazivati na greške i davati savjete nije, ni u kojem slučaju, jednostavan zadatak. Međutim, stipendisti Fondacije Hastor imaju priliku okušati se u ovoj ulozi prije nego što zakorače u mnogo izazovnije i naprednije aspekte života. Kroz samo nekoliko primjera naših vrijednih mentora uspjeli smo dočarati njihovu ulogu i iskazati benefite mentorstva.





## Humanost stipendista Fondacije Hastor na djelu kroz volontiranje u lokalnoj zajednici

*Svakodnevni život temelji se na onome što dobivamo, ali istinski živimo od onoga što dajemo*, rekao je jednom prilikom Winston Churchill. Svaka lijepa riječ koju poklonimo, savjet, ideja, sve to može obogatiti naš život, ali i život osobe kojoj to pružimo. Fondacija Hastor od svojih početaka promovira volonterski angažman i pomaganje drugima te nastoji tome podučiti svakog svog stipendistu. Volontiranje u zajednici potiče učenike da sutra budu bolja verzija sebe, da se ne plaše pomoći drugima i da se dobro dobrim uvijek vraća. Ovakav vid volontiranja učenike motiviše na doprinos izgradnji održivijeg i odgovornijeg društva kroz mjesečno provođenje humanih akcija u lokalnoj zajednici, razvijanje liderstva i svijesti o društvenim pitanjima, kao i motivaciju da čine dobra djela i šire lijepe ljudske vrijednosti.

Svakog mjeseca naše volonterske grupe postavljaju nove standarde u procesu volontiranja. U toku cijele godine naši vrijedni volonteri – studenti i učenici su doprinosili svojim lokalnim zajednicama čineći različite humane aktivnosti, a mi ćemo u nastavku izdvojiti samo neke od njih.

Posebno je inspirativna priča naših stipendistica **Ajle Hasanović** i **Alme Osmanović** koje volontiraju s dvjema grupama učenika – srednjoškolcima i osnovcima iz Tuzle. U maju su naše vrijedne mentorice sa svojim su učenicima pripremile obroke za osobe kojima je to potrebno. Zajedničkom snagom i voljom, unoseći posebnu vezu ljubavi i empatije, mentorice su sa srednjoškolcima napravile čokoladne hurme i sendviče, a s osnovcima su to sve spakovale i podijelile. **Amina Džananović**, učenica Srednje medicinske škole Tuzla, novim volonterskim iskustvom obogatila je sebe i druge oko sebe i osnažila svoj osjećaj empatije prema drugima:

*Volontiranje naših mentorica zajedno s nama u ovom mjesecu bilo je dosta drugačije od dosadašnjih. Volontiranje mi je omogućilo da bolje spoznam sebe i druge oko sebe, da osnažim svoju empatiju i pojačam brigu o drugima. To za mene nije predstavljalo samo kupovinu, pakovanje i dijeljenje prehrambenih proizvoda, već doprinos zajednici, drugima oko sebe, ali, samim time, i dobro djelo.*



Osim Ajle i Alme, naše vrijedne mentorice **Alma Ahmetović** i **Džejlana Smajić** svoje su volontiranje podigle za ljestvicu više. One volontiraju u Zvorniku s osamnaest osnovaca i tri srednjoškolca. Njihovo volontiranje započelo je sakupljanjem otpada, razvrstavanjem plastike, papira i stakla pa sve do pravljenja hranilica za životinje od plastičnih flaša i hranjenja životinja. Učenici su se zabavili te stekli nove vještine i iskustva, što se može primijetiti na osnovu njihovih utisaka koje su podijelili s nama:

*Za mene je ovo volontiranje bilo prelijepo iskustvo, osjećala sam se veoma sretno i zadovoljno jer smo se ujedinili i činili takva dobra djela, kako za životinje tako i za ljude*, kazala je **Ajla Sahanić**.



**Emira Imamović** i **Fatima Musa** sa svojim su učenicima odlučile volontirati u Domu za djecu bez roditeljskog staranja na Bjelavama. Odnijeli su im slatkiše, družili se s njima i na taj način unijeli određenu dozu radosti u njihov život. Mentorica Emira istakla je da vrlo često, i mimo volontiranja, posjete Dom, jer je nemoguće ne osjetiti povezanost i energiju s čistim srcima te djece. Za učenicu **Adnu Hajdarević** ovo volontiranje bilo je posebno zadovoljstvo:

*Volontiranje u Domu za djecu bez roditeljskog staranja za mene ima poseban značaj, budi mi posebne emocije i uvijek se rado družim s djecom. Pažnja koju im pružimo tokom igre i druženja mnogo im znači i, kao što oni vole provoditi vrijeme s nama. Sviđa mi se volontiranje u lokalnoj zajednici, osjećam se korisno i lijepo nakon svakog našeg volontiranja, a naša mentorica se uvijek potrudi da osjetimo to da smo važna karika, kako u Fondaciji tako i u društvu.*

**Uzeir Tihak** iz Gornjeg Vakufa student je treće godine na Farmaceutsko-zdravstvenom fakultetu Univerziteta u Travniku. Pored svojih akademskih obaveza Uzeir je aktivni član Omladinskog centra Bugojno, gdje u okviru volontiranja u lokalnoj zajednici s mnogo entuzijazma učestvuje u raznim aktivnostima i projektima. Ovaj stipendista je primjer da volontiranje nije samo rad bez naknade – to je čin ljubavi i saosjećanja prema zajednici, a u okviru svog volontiranja Uzeir aktivno radi na implementaciji projekata sa svrhom unapređenja stanja u lokalnoj zajednici te svojim volonterskim angažmanom kao stipendista Fondacije Hastor postaje uzoran primjer mlađim generacijama.

Jedan od značajnih projekata u kojima je učestvovao jeste "Viječko" – edukativna igra koju organizira Vijeće mladih BiH, a čiji je cilj osnovati Vijeće općine, zatim kantona i, na kraju, same Federacije. Pored navedenog, Uzeir je bio učesnik brojnih drugih projekata od izuzetnog značaja za njegovu lokalnu zajednicu.



Na kraju, poručujemo samo jedno: volontirajte – to je vještina koja će vam promijeniti pogled na svijet, nešto što će vam donijeti mir u duši i unutarne zadovoljstvo. Volontiranje je prilika da pokažete dobrotu, ljubav i brigu za ljude oko sebe i svoju okolinu. Kroz volontiranje ne samo da pomažete drugima već i unapređujete sebe. Pronađite radost u tome, budite podrška jedni drugima i zajedno gradimo bolju budućnost!





## Timovi s posebnim zaduženjima kao pokretačka snaga Fondacije Hastor

Neizostavan dio volonterskog procesa Fondacije Hastor čine timovi s posebnim zaduženjima, zahvaljujući čijim aktivnostima mnogi procesi u Fondaciji Hastor teku neometano. Studenti članovi ovih timova imaju priliku 10-16 sati mjesečno volontirati u nekim od sljedećih timovima: tim za administraciju i protokol, monitoring tim, redakcija, prevodilački tim, tim za grafički dizajn, tim za održavanje društvenih mreža, IT tim i tim za projektne aktivnosti.

Na taj način studenti mogu još u toku studija boraviti u poslovnom okruženju, naučiti korisne stvari u praksi, steći korisno radno iskustvo u oblastima za koje se školuju, jačati svoje kompetencije, čime dobijaju komparativnu prednost kada dođu na tržište rada te brže doći do željenog zaposlenja zahvaljujući stečenim kompetencijama.

### Tim za administraciju i protokol

Komunikacija sa stipendistima, telefonski i putem elektronske pošte, bilježenje njihovih obavještenja, upita, izvještaja o volontiranju i sl. sve su zaduženja **administrativnog tima**, koji komunicira i s trećim licima, odgovara na upite i molbe te pruža opće informacije o Fondaciji, procesu odabira stipendista, molbama i sl. Pored administracijskog tima, u prostorijama Fondacije volontiraju svi studenti stipendisti koji studiraju na Univerzitetu u Sarajevu. Ovi studenti u prostorijama Fondacije provode svoje volonterske sate, a prilikom volontiranja obično rade poslove koji se klasificiraju kao administrativno i kancelarijsko poslovanje, što im pruža mogućnost da se upoznaju i s ovakvom vrstom posla te im daje izvjesno iskustvo i na ovome polju.

Administrativni tim čine i studenti stipendisti koji svoje volonterske sate ulažu u sortiranje zaprimljene pošte, koja se nakon toga unosi u elektronsku knjigu protokola (**tim za protokol**). Studenti stipendisti Fondacije Hastor svoje volonterske sate ulažu u sortiranje zaprimljene pošte, nakon čega se ista unosi u knjigu protokola.

*Volontiranje u administrativnom timu za mene je bilo odličan izbor skupljanja radnog iskustva i radnih navika. Volontiranje mi je pomoglo da razvijem svoje vještine kao što su: vještina komunikacije, kritičkog razmišljanja, rješavanja problema, timskog rada i proaktivnosti u organizaciji raznih događaja, u posljednjih nekoliko godina su baš to vještine koje se traže pri zapošljavanju. Volonteri kroz svoje aktivnosti stječu puno novih znanja i vještina koje itekako mogu biti korisne u razgovoru za posao.*

*Jana Marijanović, vođa tima za administraciju*

### Monitoring tim

Tok sastanaka naših stipendista pomno prate članovi tima za monitoring i to ne isključivo iz kontrolnih razloga, naprotiv, u dosadašnjoj praksi se pokazalo da preko tima za monitoring dobijamo uvid u kreativne načine rada u toku sastanaka stipendista, saznajemo za njihove uspjehe te usvajamo nove ideje i mišljenja.

*Iskustvo monitoringa je nešto što mi je značilo i na profesionalnom i na ličnom nivou. Monitoring je mjesto gdje sam se konačno osjećala da mogu biti svoja i doprinijeti na adekvatan način Fondaciji Hastor. Opuštena atmosfera u timu te podrška koju jedni drugima pružamo je ono što nam omogućava da budemo tim kakav jesmo. Volontiranje u monitoring timu pomoglo mi je da se oslobodim anksioznosti od razgovora s nepoznatim ljudima, jer sam konstantno morala razgovarati sa studentima, pomagati im oko njihovih problema, dati savjet, biti tu za njih. Značajno mi je na profesionalnom nivou, s obzirom na to da se želim baviti poslom koji zahtijeva razgovor s ljudima i dobru komunikaciju.*

*Almedina Bogučanin, članica tima*

### Redakcija

Redakciju Fondacije Hastor čine stipendisti koji pomno planiraju sadržaj koji će se naći u okviru newslettera i web-stranice Fondacije Hastor, biraju teme za tekstove, pišu ih te uređuju. U okviru newslettera, koji se objavljuje mjesečno, mogu se naći članci koji govore o uspjehu stipendista, pozitivnim primjerima, svakodnevnim aktivnostima, ali se predstavljaju i umjetnički radovi u okviru poetskog kutka. Kako je i spomenuto, pored newslettera, naša redakcija uređuje i tekstove koji se objavljuju na web-stranici Fondacije te time pravovremeno obavještava stipendiste i širu javnost o najznačajnijim događajima vezanim za Fondaciju.

*Volonterski angažman u redakcijskom timu značajno je unaprijedio moje profesionalne vještine i, naravno, doprinio stjecanju iskustva u radu u struci. Kako je tokom redovnog studija jezika teško iskusiti i radnu atmosferu i teorijsko znanje praktično primijeniti, volontiranje u Fondaciji – lektorisanje biltena i ostalih sadržaja – bilo je, zapravo, prvi korak u poslovni svijet unutar profesije za koju se i školujem. Pored toga, to iskustvo doprinijelo je i stvaranju još kvalitetnijih radnih navika i djelovanja u timu. S tim u vezi, izuzetno sam zahvalna Fondaciji Hastor na prilici da svoje profesionalne vještine usavršavam čak i tokom studiranja.*

**Amina Bašić, članica tima**

### Prevodilački tim

Usko saradujući s redakcijskim timom, ovaj tim je prvenstveno zadužen za prevođenje mjesečnog biltena Fondacije Hastor na engleski i njemački jezik, kako bi bio dostupan svima onima koji prate Fondaciju. Pored toga, tim prevodi godišnje izvještaje, članke na web-stranici i druge vrste dokumenata koji se potražuju u Fondaciji. Prevodima na dva svjetska jezika vijesti o događanjima, aktivnostima i uspjesima u Fondaciji dopiru do svih onih koji dijele i podržavaju misiju Fondacije. Na ovaj način naši međunarodni prijatelji su uvijek u toku s aktivnostima u Fondaciji.

*Volontiranje u prevodilačkom timu je imalo višestruk značaj za mene i za sve studente. Osim razvijanja komunikacijskih i organizacionih vještina, volontiranje u ovom timu donosi neprekidno usvajanje novog vokabulara kao i ponavljanje jezičkih konstrukcija koje nemamo priliku koristiti u svakodnevnom životu. Prevod, lektura i korektura biltena Fondacije Hastor, osim stručnih benefita nudi i mogućnost poznavanja aktivnosti, postignuća i rezultata koje su postigli stipendisti Fondacije Hastor. Biti upućen u sve te uspjehe mladih ljudi djeluje prije svega motivirajuće, a potom vas čini ponosnim, jer ste i vi zajedno s njima dio jedne humane priče, kakvu Fondacija Hastor piše već 18 godina.*

**Lamija Horić, vođa prevodilačkog tima za njemački jezik**

### Tim za grafički dizajn

Mjesečni newsletter Fondacije Hastor, godišnji izvještaji, web-stranica i naše društvene mreže uvijek imaju kreativan i profesionalno osmišljen dizajn. Za to su zaslužni studenti likovnih akademija, odsjeka za grafički dizajn, multimediju i sl. Pored svojih glavnih obaveza, u okviru svog rada vode računa o dizajnu svih dokumenata i priznanica koje nastaju i koriste se u Fondaciji.

*Kada god me prijatelji ili poznanici pitaju za Fondaciju Hastor, kako funkcioniše, šta rade stipendisti i kakve benefite imaju, prve riječi mog odgovora budu da imamo pruženu priliku raditi ono što „želimo“, a ne ono što „moramo“. Moje volontiranje je odličan primjer ovoga: student sam grafičkog dizajna i multimedije, i volontiram u timu za - baš to. Vrijeme volontiranja provodim najčešće kreirajući mjesečne biltena, i u sa saradnji s kolegama iz redakcije radim na tome da tekstove koje oni predivno napišu vizuelno sklopim u jedan bilten. Ovo mi je, bez ikakvog pretjerivanja, i omiljena aktivnost jer zapravo imam realnu i praktičnu primjenu svega onoga što učim na fakultetu, i priliku da radim u sjajnom okruženju gdje svi poštuju jedni druge i zadane rokove, voljni su pomoći, dati savjet i puni su želje da zajedno kreiramo fenomenalne stvari, ne da samo ispoštujemo ono što nam je „zadano“.*

**Sara Keserović, članica tima**



### Tim za održavanje društvenih mreža

Svjesni važnosti informisanja u svijetu današnjice, a zahvaljujući timu za održavanje društvenih mreža redovno kreiramo objave na društvenim mrežama (Facebook, Instagram, LinkedIn). Svaka objava se zasebno posmatra i projektuje, dizajn objave se prilagođava temi, sadržaj je sažet, ali veoma informativan. Svojim objavama tim informiše javnost o dešavanjima u okviru Fondacije, rezultatima stipendista te najavljuje nadolazeće događaje.

*Biti lider tima za društvene mreže Fondacije Hastor za mene predstavlja jedinstvenu priliku za kontinuirano učenje i primjenu znanja koje sam stekla kroz formalno obrazovanje u praksi. Kroz koordinaciju tima i zadataka, kreiranje sadržaja i analizu rezultata, razvila sam svoje liderske, organizacijske i komunikacijske sposobnosti. Saradnja s osobama različitih profila naučila me kako se nositi s različitim izazovima i preprekama te istovremeno doprinijela mom ličnom razvoju kroz razvijanje empatije, fleksibilnosti i sposobnosti da prepoznam kvalitete drugih ljudi. Sa sigurnošću mogu reći da mi je volonterski angažman u Fondaciji Hastor od iznimnog značaja i za lični i za profesionalni razvoj. Zahvaljujući ovom iskustvu osjećam se mnogo spremnijom, samopouzdanijom i konkurentnijom na tržištu rada.*

**Venesa Karić, vođa tima**

### IT tim

Redovno ažuriranje službene web-stranice Fondacije Hastor, izrada novih projekata te održavanje postojećih je povjereno IT timu, koji je zaslužan za online platformu Fondacije Hastor. Njome su olakšane aktivnosti stipendista, kao i slanje izvještaja ili najava volonterskih druženja te su se na ovaj način izbjegle komplikacije koje su ranije mogle biti prisutne, a naš vrijedni tim neprestano radi na poboljšanju svih postojećih platformi i uvođenju novih, korisnih za sve naše stipendiste.

*Volontiranje u IT timu Fondacije Hastor mi je dalo priliku da povežem teoriju s praksom i stvarno doprinesem zajednici kroz IT rješenja. Kroz rad na projektima, posebno na aplikaciji namijenjenoj za olakšavanje volonterskog procesa, stekao sam korisne vještine koje inače ne bih dobio samo kroz studij. Ovo iskustvo mi je dalo priliku da radim na nečemu praktičnom, da dodatno razvijem liderske i organizacijske vještine, te mi je otvorilo put prema budućim projektima.*

**Edin Šahbaz, član tima**

### Tim za projektne aktivnosti


Uspješnim djelovanjem Fondacija Hastor nastoji proširiti svoje aktivnosti i na druge vidove pomoći mladima odnosno obrazovnim ustanovama s područja koja su ekonomski najnerazvijenija u Bosni i Hercegovini. Nastojeći razviti poduzetnički duh kod mladih, u protekloj godini je formiran tim za projektne aktivnosti, s ciljem aktiviranja njihovih kreativnih potencijala, motiviranja na predstavljanje ideja i realizaciju zadatih ciljeva, kako bi mogli doprinijeti pozitivnim promjenama u bh. društvu.

*Volontiranje u timu za projektne aktivnosti za mene predstavlja jedno posebno iskustvo. Na samom početku volontiranja sam osjećala određenu dozu straha, misleći da će odgovornost biti prevelika, ali zahvaljujući podršci mentora, kolega i dobroj organizaciji, uspjele smo realizovati sve zadatke do sada. Svaki novi zadatak predstavlja izazov koji zahtijeva istraživanje i prilagođavanje, a kroz projektne aktivnosti poboljšavamo naše vještine i razvijamo se kao tim. Ovaj angažman mi je već omogućio da naučim mnogo novih stvari i steknem kompetencije koje su mi pomogle pri apliciranju za stručne programe i edukacije. Smatram da je volontiranje u timu za projektne aktivnosti ključno za unapređenje mog znanja i razvijanje sposobnosti koje će mi koristiti u budućnosti.*

**Tijana Sadiković, članica tima**

## *Uspjesi novog modela volontiranja kroz klubove za instruktivnu nastavu*

Fondacija Hastor je, želeći svojim stipendistima i učenicima pružiti maksimalnu podršku i pomoć, u okviru novog modela volontiranja započela s realizacijom instruktivne nastave kroz kroz šest pažljivo organiziranih i osmišljenih klubova te dodatni klub za nadarene učenike Fondacije Hastor, koji žele proširiti svoje znanje. Ovu skupinu čine:



U skladu s predstavljenim nazivima, svaki od navedenih klubova imao je zaduženja u okviru svojih oblasti, a članovi klubova – studenti stipendisti Fondacije Hastor – u okviru svojih volonterskih angažmana održavali su instruktivnu nastavu iz onih polja koja najbolje poznaju te su na taj način razvijali svoje vještine i pomagali učenicima da prevaziđu prepreke i nejasnoće na koje su nailazili.

S velikim ponosom i nimalo skromno može se istaknuti kako su u ovih godinu dana i studenti i učenici ostvarili odlične rezultate i zajedno na ovom primjeru još jednom potvrdili jedan od osnovnih postulata Fondacije Hastor – međusobno pomaganje kao ključ uspjeha jedne zajednice.



### Klub za bosanski, hrvatski i srpski jezik i književnost

Članovi Kluba za bosanski, hrvatski i srpski jezik i književnost učenicima stipendistima Fondacije Hastor održavali su instruktivnu nastavu iz oblasti u okviru bosanskog, hrvatskog i srpskog jezika i književnosti pomažući im nesebično da savladaju gradivo i poprave svoje ocjene iz navedenih predmeta. Članica Kluba **Zerina Hrnjica** podijelila je s nama iskustvo ovakvog načina volontiranja:

*Volontiranje u Fondaciji Hastor kroz program instrukcija za stipendiste pokazalo se kao izuzetno korisno i značajno iskustvo. Aktivnosti koje provodimo omogućile su nam da direktno doprinesemo školskom napretku učenika, pri čemu su mnogi značajno popravili svoje ocjene iz bosanskog jezika. Ovaj oblik volontiranja nije samo koristio učenicima već je i studentima pružio priliku za razvoj pedagoških vještina i osjećaj zadovoljstva zbog doprinosa zajednici. Sveukupno gledano, ovakav način volontiranja pokazao se kao izuzetno vrijedna inicijativa koja doprinosi ne samo obrazovanju, već i izgradnji boljeg društva.*

### Klub matematičara i fizičara

Kako su matematika i fizika jedni od najizazovnijih i najtežih školskih predmeta, tako su i naši članovi Kluba za matematiku imali pune ruke posla. Ovaj Klub bio je ubjedljivo najaktivniji i održao najveći broj instrukcije za učenike te, u konačnici, i ispunio svoj osnovni cilj.

Kako je to kad se spoji ugodno s korisnim i primijeni se znanje s fakulteta u praksi, istakla nam je naša stipendistica **Elvedina Fidani**:

*U okviru moga volontiranja u Klubu matematičara i fizičara radila sam s velikim brojem učenika iz različitih gradova te imala sam priliku davati instrukcije iz različitih oblasti matematike i fizike. Prema mom mišljenju, instrukcije su odlična pomoć koja se pruža učenicima u savladavanju određenih poteškoća u okviru školskih predmeta. Velika mi je čast i zadovoljstvo kada mogu prenijeti moje znanje nekome i tako pomoći mu kada mu je pomoć potrebna.*

### Klub za engleski jezik

Klub za engleski jezik jedan je od onih s većim brojem članova koji uz odličnu organizaciju i još bolju međusobnu komunikaciju stižu održati veliki broj instruktivnih časova za učenike. Većina učenika ima poteškoća upravo sa stranim jezicima, ali su naši stipendisti bili tu da im pomognu i olakšaju gradivo tokom školske godine. Većina njih postanu i prijatelji pa im instrukcije osim za učenje budu i prilika za druženje i razgovor. Naša stipendistica **Šerifa** je zahvaljujući instrukcijama umnogome popravila svoje znanje engleskog jezika:

*Instrukcije su mi baš pomogle i ispravila sam ocjene. Mentorica mi je jako pomogla i na tome joj se zahvaljujem. Mislim da je pružanje instrukcija u Fondaciji Hastor dobra stvar i da mnogo pomaže učenicima.*

Stipendistica **Elma Karajkić** članica je Kluba za engleski jezik od samog početka i s nama je podijelila svoje utiske:

*Kroz instrukcije iz engleskog jezika smatram da se nije samo engleski naučio već i razumijevanje i poštovanje, međusobna saradnja i ljubav za učenjem. Neopisiv je osjećaj kada vam se učenik javi nakon instrukcija da saopšti popraavljenju ocjenu ili primljeno znanje. U tom momentu niste samo "instruktor" već ste neko ko je uspio pružiti dovoljno pažnje i posvećenosti da se događaj te naravi desi. Smatram da je razvijanje ovakvih klubova bio korak pri pisanju jedne iskrene i prekrasne priče.*

### Klub za njemački jezik

Klub za njemački jezik imao je pune ruke posla, no to našim vrijednim stipendistima nikada nije predstavljalo problem, naprotiv, instrukcije su koristili kao priliku da se pripreme za svoje buduće nastavničke pozive i već sada stižu iskustvo u radu s djecom objašnjavajući im lekcije koje slabije razumiju. Vođa Kluba **Amila Mlačo** s nama je podijelila svoje iskustvo u radu s članovima Kluba za njemački jezik:

*Naš cilj je bio učenicima olakšati učenje njemačkog i približiti učenje istog kroz zanimljive radionice koje smo vrijedno spremali uz teme koje učenici najave tokom pripreme sastanka da im nisu jasne. Tokom saradnje učenici su pokazali zainteresovanost i ozbiljnost na obostrano zadovoljstvo. Kao vođa kluba imam potrebu spomenuti da su članovi kluba jako vrijedni studenti koji su ponekad održavali sastanke za dva ili više učenika, zavisno od broja učenika na aplikaciji. Naš cilj ubuduće je da nastavimo isto motivirani i disciplinirani, da ispravimo nedostatke koje uvidimo, kroz razne interaktivne radionice i teme uvedemo učenike u učenje njemačkog jezika.*

Učenici su objuerčke prihvatili priliku pomoć Fondacije Hastor na njihovom putu u savladavanju stranog jezika, a to ističe i naša stipendistica **Bejta**, učenica osnovne škole koja je, zahvaljujući instrukcijama, popravila ocjenu iz ovog predmeta:

*Instrukcije iz njemačkog su mi jako dobre i korisne. Mentorica mi je pomogla da popravim ocjene, pa sad imam mnogo bolje ocjene nego ranije. Veliko hvala Fondaciji Hastor.*

### Klub za IT i tehničke nauke

S obzirom na to da je posljednjih godina IT sve zastupljeniji na tržištu pa tako i predmeti koji se povezuju s ovom oblašću u školi, učenici stipendisti Fondacije Hastor imali su mogućnost instruktivne nastave i iz ovih predmeta. Članovi ovog Kluba iskoristili su svoju kreativnost te učenicima nerijetko osim instrukcija i onoga što im je neophodno, proširivali znanje iz ove oblasti čineći im školsko gradivo još zanimljivijim.

Naša stipendistica studentica **Tajana Salkić** uživala je u cijelom ovom procesu te je s nama podijelila svoje impresije i iskustva s instrukcije u proteklih godinu dana:

*Ovaj vid volontiranja naučio me je važnosti timskog rada, strpljenja i prilagođavanja različitim potrebama i stilovima učenja. Učenici koji su prisustvovali instrukcijama često su dolazili s nedoumicama i nesigurnošću, a nakon zajedničkog rada odlazili su s boljim razumijevanjem gradiva. Njihova zahvalnost i napredak bili su dovoljno velika nagrada. Ovo iskustvo me podsjetilo koliko su male promjene koje možemo napraviti u životima drugih značajne i ispunjavajuće. Osim što učenici dobijaju podršku u obrazovanju, i ja kao volonterka stječem dragocjena iskustva. Ovakav rad omogućio mi je da dublje analiziram gradivo, usavršim vještine prenošenja znanja i razvijem veću empatiju prema učenicima. Naučila sam kako uspostaviti povjerenje i motivirati druge, što je neprocjenjivo u mom daljem razvoju.*

Koliko je vrijedna podrška i pomoć studenata u procesu savladavanja školskog gradiva, govori i naša stipendistica **Samra**, učenica srednje škole:

*Zadovoljstvo mi je bilo učiti od Tajane, jer zaista vlada materijom i uspjela mi je približiti gradivo koje je bilo relativno apstraktno. Uvijek je pozitivna i jako se dobro snalazi. Naravno, usput mi je davala i dosta savjeta koji bi mi bili od pomoći kasnije, ukoliko odlučim ostati u IT svijetu.*



### Klub zdravstvenih studija

Fondacija Hastor ima veliki broj učenika koji pohađaju srednje medicinske i zubotehničke škole te je, u skladu s potrebama ovih učenika, osnovan i Klub zdravstvenih studija kako bi njegovi članovi, uglavnom studenti medicinskih fakulteta, mogli pružiti instruktivne časove iz stručnih predmeta za srednjoškolce, ali i iz standardnih predmeta poput hemije za sve učenike. Učenici su na instrukcijama bili redovni i koristili benefite ovog učenja maksimalno, a svoje iskustvo s nama je podijelio **Bakir**, učenik osnovne škole:

*Uz pomoć instrukcija i dodatnog truda, uspio sam značajno popraviti svoje ocjene iz hemije. Posebno sam zahvalan na jasnom objašnjenju i podršci koja mi je pomogla da razumijem gradivo i postignem bolje rezultate. Ovo iskustvo me motivisalo da nastavim raditi na sebi i svojim ciljevima. Hvala Fondaciji Hastor i mentorici.*

Članica kluba **Ajla Džinić** govorila je o važnosti instrukcija za učenike, ali i za studente:

*Angažman u ovom klubu vidim kao uspješan projekat koji je istovremeno doprinio učenicima i članovima kluba u poboljšanju različitih vještina. Studenti su kroz pripreme gradiva i rad s učenicima tokom prethodne godine svakim časom unapređivali kvalitet rada, što nas je dovelo do našeg generalnog cilja, unapređenja znanja učenika. Imali smo dosta povratnih informacija od učenika da su bolje shvatili gradivo ili uspjeli i popraviti ocjenu zahvaljujući našim instrukcijama. Svi članovi kluba su tokom prethodne godine dali svoj maksimum da učenicima na što bolji način približe i olakšaju savladavanje gradiva i smatram da će se to tako i nastaviti samo sa još boljim kvalitetom i nizom uspjeha.*

### Klub za edukaciju

Ponosno možemo kazati da su većina učenika stipendista Fondacije Hastor odlični učenici koji su vrijedni, marljivi i željni znanja. Razmišljajući o načinima kako ovoj skupini učenika pružiti priliku za dodatno usavršavanje iz oblasti koje su im zanimljive, a da pritom zavole volontiranje i stiču naviku dijeljenja znanja, Fondacija Hastor je u okviru novog modela volontiranja osnovala Klub za edukaciju, namijenjen isključivo odličnim učenicima, kroz koji su učenici imali priliku na naprednijem nivou učiti i obrađivati koncepte koje nisu imali priliku raditi u okviru redovne nastave. Tim povodom naši studenti su obrađivali razne teme iz oblasti kao što su: astronomija, zdravlje, matematika, IT i grafički dizajn, izgradnja i razvoj ličnosti i sl, a neke od najzanimljivijih radionica nosile su nazive: *Zašto čokoladica košta 2 KM?; Da li bih proizvodio 1 kg krompira ili 1 kg iPhone-a?; Je li jabuka zaista nešto slatko?* itd. Članovi ovog kluba studenti su različitih fakulteta koji su još na samom početku imali i ideje i vizije kako učenicima približiti oblasti koje ih zanimaju i kako ih podučiti onome o čemu žele znati više.

Učenici su na samom početku, u skladu sa svojim interesima, odabrali oblasti o kojima žele učiti, a naši studenti su svoja opća ili znanja s fakulteta koristili maksimalno nastojeći učenike zainteresirati i približiti im ono o čemu ne uče u školi. Tako je naš student anglistike na Filozofskom fakultetu Univerziteta u Sarajevu **Ivan Rajić** svojim učenicima pričao o svijetu muzike i, vodeći se najljepšim notama, djecu uvodio u nepregledne svjetove ove umjetnosti:

*Radionice o svijetu glazbe su učenicima dale jako bitan uvod u ono što glazba znači. Moja uloga kao voditelja radionica nije bila da učenicima kažem koju muziku trebaju da slušaju, to bi bilo suludo, ali smo probali analizirati istinski razlog zašto muzika postoji i što je dobro donijela svijetu. Učenici su jako pozitivno reagirali na glazbu o kojoj smo učili, koju smo analizirali. Radionice su bile konstruirane tako da se učenici opuste nakon iscrpljujućih sati u školama, i onda da u tom opuštenom stanju upiju neko shvaćanje, neku informaciju koja će ostati zapisana dugo pa možda čak i zauvijek.*

Nevjerovatno je i inspirativno bilo gledati učenike kako su s radošću prihvatili ovakav način volontiranja želeći učiti i o svijetu u kojem žive saznajući sve više. Klub za edukaciju u ovih skoro godinu dana bio je mala oaza znanja koju su i učenici, ali i njihovi prijatelji mentori pažljivo i vrijedno gradili te, u konačnici, s nama podijelili rezultate koje su postizali. Kako smo i kazali ranije, učenici i njihovi mentori u cijelom ovom procesu postajali su prijatelji i nerijetko su, po završetku volontiranja, njihovi razgovori tekli i brojnim drugim tokovima te su na taj način i još više uživali u cijelom ovom procesu.

**Moje iskustvo s matematičkim radionicama jeste iznimno pozitivno i energija je uvijek bila tu. Djeca su bila uvijek spremna raditi i uključiti se u samu razradu zadataka. Nakon nekog vremena postali smo pravi prijatelji i tu smo bili ukoliko nekome treba i pomoć oko nekih tema ili se nekome jednostavno razgovara. Mnogo talentovanih učenika je bilo koji su koristili ove radionice kao pripremu za takmičenja, kao pripremu za prijemni ili kao pripremu za neke oblasti studija, gdje su se radionice statistike i privredne matematike pokazale kao najtraženije. Učenicu su se vraćali i iznova birali matematiku, što je meni veoma bilo drago, jer sva iskustva do sada su mi pokazivala da učenici bježe od matematike. Ovdje to nije bio slučaj. Za mene je ova godina volontiranja u Klubu za edukaciju bila izuzetno korisna. Doradila sam svoje vještine prezentiranja, prenošenja znanja, ali također i dosta naučila od mojih učenika. Volontiranje mi je donijelo neku disciplinu i zadovoljstvo također, koje prije nisam osjetila. Vjerujem da je i učenicima mnogo značilo i drago mi je da sam bila dio tog iskustva.**

Naša stipendistica **Lejla Fežić** ovu priliku iskoristila je da grupi učenika od samog početka drži svojevrsni kurs fotošopa (program Adobe Photoshop) nastojeći im na svakom sastanku maksimalno prenijeti ono što ona zna, a nerijetko je, kako kaže, s njima i sama učila više. Učenici su bili oduševljeni onim o čemu im je Lejla iz mjeseca u mjesec govorila te su aktivno upijali znanja koristeći ih kasnije u svakodnevnom životu i školi:

**Radionica s Lejlom jedno je prelijepo iskustvo. Kroz inspirativnu prezentaciju omogućila je meni i svim prisutnima da naučimo toliko toga, a njen način prezentiranja bio je izvanredan. Svojim pristupom i ogromnom ljubavlju prema onome što radi ohrabrila je i mene da dublje istražim područje koje je predstavila i nastavim svoj put s novom inspiracijom kojom me nadahnula,** kaže nam stipendistica **Arnela**.

Na samom kraju možemo kazati kako smo po ko zna koji put ponosni na naše stipendiste i trud koji svakodnevno ulažu kako bi volonterski proces bio što efikasniji i produktivniji i kako bi naši učenici stjecali što više znanja o kojem ne uče u školi. Vjerujemo da će i u budućnosti na putu koji je otpočeo Klub za edukaciju jedina skretnica biti da je obrazovanje izbor pobjednika i da će naši učenici i studenti stipendisti uvijek birati ovakve puteve.





## *Prilike u Fondaciji Hastor: od stručne prakse u toku studija do zaposlenja u struci*

Studenti stipendisti kroz volonterski proces u Fondaciji Hastor imaju priliku usvajati korisna znanja i vještine, dobiti korisna iskustva kroz rad s učenicima stipendistima, usavršavati se u oblastima kojima se planiraju baviti, jačati svoje kompetencije u cilju bržeg dolaska do željenog zaposlenja i mnoge druge benefite. Nije mali broj naših stipendista koji su zahvaljujući svom angažmanu u okviru volonterskog procesa u Fondaciji Hastor pronašli priliku za željeno zaposlenje i lični napredak, a jedan od takvih primjera donosimo kroz priču u nastavku.

**Sumeja Kadribegović**, sada već alumnistica Fondacije Hastor, zahvaljujući svom predanom trudu i zalaganju u okviru volonterskih aktivnosti, ali i sjajnom akademskom uspjehu, u proteklom periodu je dobila priliku za obavljanje stručne prakse u kompaniji Prevent Holding, jednoj od članica ASA Prevent grupacije, a o značaju same prilike za praksu ističe:

***Poziv iz Fondacije za praksu u Prevent Holdingu u svojstvu psihologa, u zadnjem semestru mojih studija, povećalo mi je nade i vjerovala sam da će zapravo baš tu biti moj početak. Drago mi je što sam bila studentica čiji su trud i zalaganje prepoznati, a praksu sam nastojala odraditi potpuno posvećeno i odgovorno te ostaviti pozitivan utisak. Ta praksa je bila odličan most između dotadašnjeg akademskog i novog profesionalnog puta.***

Prepoznavši njen trud, kvalifikacije i želju za usavršavanjem, Fondacija Hastor ju je preporučila za obavljanje stručne prakse u navedenoj kompaniji, što je bio prvi korak u njenom profesionalnom razvoju, s obzirom na to da je, nakon samo nekoliko mjeseci provedenih na stručnoj praksi, Sumeja dobila priliku za priključivanje stalnom timu uposlenika Prevent Holdinga, dobivši svoje prvo zaposlenje u struci – na poziciji saradnika za ljudske resurse. Kako se snašla u prvim mjesecima na ovoj radnoj poziciji, otkriva nam u nastavku:



*Prvo zaposlenje je velika stvar za sve mlade ljude koji se nalaze pred okončanjem svojih studija. Nervoza raste, očekivanja su nejasna, motivacija je velika. Zahvalna sam što je menadžment u Prevent Holdingu prepoznao moju volju i kompetencije te napravio priliku za moje zaposlenje. Raditi u ovakvoj grupaciji, za više firmi, a posebno u proizvodnom sektoru, svakodnevni je izazov koji pruža priliku za učenje, usavršavanje znanja i razvijanje svog profesionalnog djelovanja. Istakla bih i važnost mentora koji nas vode kroz proces obuke i osposobljavanja za radne obaveze koje preuzimamo, a ja bih se pohvalila da sam zaista imala i imam u svom okruženju prave profesionalce koji su spremni pomoći i biti podrška u bilo kojem trenutku.*



CAREER

Shvativši važnost pružanja prilike za lični napredak, Sumeja je uspjela pronaći mnogo veću priliku za sebe i stvoriti uslove za dalji napredak, razvoj i usavršavanje, a svim stipendistima i mladima poručuje:

*Duboko sam ubijeđena da se svaki trud isplati te da sebi trebamo staviti kao imperativ nastojanje za učenjem, proaktivnim djelovanjem i bivanjem korisnim za našu okolinu.*



# Najznačajniji događaji u 2023/2024. godini

## *Potpisivanje ugovora o stipendiranju s učenicima stipendistima Fondacije Hastor za školsku 2023/24. godinu*

Članovi Fondacije Hastor su i u 2023/2024. godini neumorno i predano radili u cilju proširenja svoje velike porodice. Potpisivanjem ugovora o stipendiranju sa stipendistima učenicima osnovnih i srednjih škola Fondacija Hastor još jednom je pokazala kako je najuspješnija fondacija ovog tipa na našim prostorima, prešavši više od 10.000 km u junu 2023. godine da bi uspješno okončala prijem stipendista i proces potpisivanja ugovora na području cijele Bosne i Hercegovine i osigurala stipendije za učenike te tako izvršila svoj plan i u 2023/2024. školskoj i akademskoj godini ostvarila više od 2.300 stipendista.

Od samog njenog osnivanja poznato je da Fondacija Hastor, osim stipendije koju njeni stipendisti primaju svih dvanaest mjeseci u godini, svojim stipendistima svakog mjeseca kroz pažljivo kreiran sistem volontiranja pruža i priliku da nauče nešto novo što će ih pripremiti prvenstveno za život, ali i za njihov akademski put i razvoj. Studenti stipendisti svojim

predanim mentorskim radom pripremaju razne oblike predavanja, prezentacija, radionica i na mnoge druge načine utječu na učenike osnovnih i srednjih škola i tako uveliko sudjeluju u stvaranju uspješnih lidera u našoj državi. Upravo tako svaki pojedinac Fondacije čini puzzlu koja bi bez bilo kojeg od navedenih dijelova bila nepotpuna, a svi ponaosob doprinose boljem i efikasnijem načinu ostvarenja ciljeva i ideja Fondacije.

U cjelokupnom periodu stipendiranja, a kroz volonterske radionice i sastanke Fondacija od stipendista nastoji izgraditi buduće lidere, unaprijediti njihove vještine, ali iznad svega – usaditi pozitivne ljudske vrijednosti i osobine koje će im na putu ličnog razvoja i napretka biti velika olakšica. Prije svega, u njih se nastoje ugraditi osobine plemenitosti, humanosti, pomaganja i dijeljenja dobra, koje će im ostati ugrađene i nakon prestanka stipendiranja u Fondaciji Hastor te će ih dalje moći prenositi na druge u svojoj okolini.





## *Potpisivanje ugovora o stipendiranju sa studentima za akademsku 2023/2024. godinu*

Kraj oktobra 2023. godine obilježen je potpisivanjem ugovora o stipendiranju sa studentima stipendistima Fondacije Hastor za 2023/2024. akademsku godinu. Potpisivanju su prisustvovali naši dugogodišnji stipendisti među kojima su bili i studenti završnih godina fakulteta kojima je ovo posljednji potpisani ugovor, ali i veliki broj bruceša koje je Fondacija Hastor podržavala kroz osnovnoškolsko i srednješkolsko obrazovanje, a kojima je ovo prvi potpisani studentski ugovor o stipendiranju. Na ceremoniji potpisivanja ugovora je prezentiran i unaprijeđeni model volontiranja.

Naime, Fondacija Hastor od početka svog djelovanja kontinuirano pomaže i podržava usavršavanje i obrazovanje mladih osoba, a jedna od njenih najprepoznatljivijih komponenti jeste volontiranje. Kreiranjem novog modela volontiranja od ove godine je taj aspekt dodatno unaprijeđen, a nakon potpisivanja ugovora studentima su održane i obuke za njihov predstojeći volonterski angažman. Obuke su održane s ciljem što bolje pripreme studenata za njihov volonterski angažman kako bi se mogli bolje snaći u budućim ulogama te kako bi

svoja znanja što kvalitetnije prenosili na mlađe generacije. Svi stipendisti su raspoređeni u odgovarajuće volonterske timove i klubove u skladu s njihovim poljem zanimanja ili studiranja te će pored finansijske pomoći svih 12 mjeseci u godini imati priliku da kroz volonterski angažman usvršavaju svoja znanja i vještine te time sebe čine konkurentnijim na tržištu rada, ali u isto vrijeme i da pomažu drugima i čine svoje lokalne zajednice boljim mjestima za život.

Ulaskom u novu akademsku godinu veliki broj stipendista je završilo svoje obrazovanje te je njihovo formalno stipendiranje završeno, ali su oni sada, novom stepenicom svog života, zakoračili u Alumni klub kroz koji će Fondacija dalje pratiti njihove profesionalne korake i biti ponosna na empatične i dobre mlade osobe i njihove uspjehe. Novim brucešima su potpisivanjem ugovora širom otvorena vrata u porodicu studenata stipendista uz želju da budu uspješni studenti i nadu da će ih Fondacija Hastor pratiti do njihovih diplomskih i magistarskih diploma.







## Uspješno realiziran projekt

### *Empowering Girls and Young Women through Mentoring Support*

Vodeći se svojom dugogodišnjom misijom Fondacija Hastor je, u saradnji s Ambasadam Francuske u Bosni i Hercegovini, uspješno realizirala projekt *Empowering Girls and Young Women through Mentoring Support*, kroz koji se nastojalo doprinijeti generalnom osnaživanju položaja žena u bh. društvu čime Fondacija Hastor nastavlja aktivno raditi na pokretanju bitnih promjena u zajednici.

Realizacija projektnih aktivnosti podrazumijevala je dodjelu stipendija studenticama koje su kroz edukativne radionice radile na neformalnom obrazovanju 50 učenica 3. razreda

srednje škole te nastojale djelovati na podizanje svijesti o vrlo važnim temama i pružiti jasne i čvrste temelje za dalji razvoj učenica koje su prisustvovala radionicama koje su održane širom Bosne i Hercegovine – u: Sarajevu, Zenici, Konjicu, Mostaru, Novom Travniku, Bijeljini, Živinicama i Zvorniku.



**AMBASSADE  
DE FRANCE  
EN BOSNIE-  
HERZÉGOVINE**

*Liberté  
Égalité  
Fraternité*





**FONDACIJA  
HASTOR**

**Fondacija Hastor kroz realizaciju projekta *Podrška obrazovanju mladih koji dolaze iz socijalno ugroženih porodica i ove godine dala podršku neformalnom obrazovanju mladih***

Društvenu odgovornost i djelovanje za dobrobit zajednice, s fokusom na mlade u Bosni i Hercegovini, Fondacija Hastor potvrdila je kroz uspješnu realizaciju projekta *Podrška obrazovanju mladih koji dolaze iz socijalno ugroženih porodica* u saradnji s Općinom Novi Grad Sarajevo, obezbjeđujući priliku da se lokalna zajednica uključi u vrlo značajan proces podrške obrazovanju, kroz pomoć učenicima i studentima koji žive u težim socijalnim uslovima.

Kroz glavni cilj projekta – pružanje finansijske i mentorske podrške učenicima i studentima s područja općine Novi Grad – učenici su imali priliku kroz redovne mjesečne volonterske sastanke u trajanju od četiri mjeseca prisustvovati edukativnim radionicama na kojima su pripremani za izazove koje donosi dalje školovanje te im se nastojalo pomoći da prevaziđu prepreke i probleme na koje nailaze tokom školovanja.



Općina Novi Grad Sarajevo



**FONDACIJA**  
H A S T O R



## *Potpisivanje ugovora s novim studentima stipendistima Fondacije Hastor*

Fondacija Hastor svake godine pruža nove prilike vrijednim mladim ljudima i otvara vrata svoje velike porodice. Na osnovu pravila i kriterija, početkom 2023/2024. akademske godine raspisan je konkurs za dodjelu stipendija za redovne studente koji su upisani prvi put u akademsku 2023/2024. godinu. Pravo na prijavu ostvarili su studenti akreditiranih visokoškolskih ustanova u Bosni i Hercegovini.

Na osnovu pravila i kriterija, Komisija za odabir stipendista odabrala je one koji su se najviše istakli akademskim postignućima, svojim volonterskim angažmanima i društvenim doprinosom te su uspjeti balansirati sve obaveze i zadržati izuzetan akademski uspjeh.

Nakon završenog konkursa, održani su intervjui i potpisani ugovori s 23 novih studentica i studenata. Kao i svaki put do sada, Fondacija Hastor u novu godinu ušla je s novim ambicijama, planovima, ciljevima, ali i novim stipendistima koji će proširiti našu mnogobrojnu porodicu i unijeti osvježenje gradeći nova prijateljstva.


Tim povodom organizovan je sastanak s novim stipendistima, s ciljem njihovog međusobnog upoznavanja, ali i upoznavanja s konceptom volontiranja i volonterskim angažmanima u okviru Fondacije.





## *Uveden novi program podrške nadarenim i talentovanim učenicima*

Nastavljajući svoju misiju, Fondacija Hastor je odlučila napraviti iskorak te je, pored redovnog konkursa koji je otvoren za sve učenike, u januaru 2024. godine objavila i Konkurs za nadarene i talentovane učenike s područja cijele Bosne i Hercegovine. Naime, redovni konkurs kroz koji je u toku svog dugogodišnjeg djelovanja Fondacija Hastor dodijelila stipendije hiljadama učenika, namijenjen je svim učenicima pri čemu se, pored školskog uspjeha, najveći fokus stavlja na socioekonomski status učenika, dok se kroz novi program podrške fokus stavlja na nadarene i talentirane učenike koji postižu izvanredne rezultate, kako na polju nastavnih tako i na polju vannastavnih aktivnosti. Na ovaj je način Fondacija Hastor otvorila svoja vrata još jednoj skupini učenika te pokazala da je velika podrška i učenicima koji žive u izrazito teškim socioekonomskim uslovima, ali i nadarenim i talentiranim učenicima koji vrijedno rade i spremni su kroz obrazovanje unaprijediti svoj, ali i živote drugih.



Po završetku konkursne procedure, pravo na stipendiranje ostvarili su najuspješniji učenici s kojima je 30. marta 2024. godine održan sastanak i potpisani prvi ugovori o stipendiranju. Po ovom konkursu za nadarene/talentovane učenike pravo na stipendiranje ostvarilo je ukupno 93 učenika s područja cijele Bosne i Hercegovine te sa zadovoljstvom naglašavamo da je kroz novi program podrške Fondacije Hastor pažnja usmjerena i na nadarene i talentirane učenike koji postižu izvanredne rezultate na različitim poljima kako nastavnih tako i vannastavnih aktivnosti. Na ovaj je način Fondacija Hastor još jedanput uspješno ostvarila svoj cilj pružanja prilika učenicima koji predano rade na svom obrazovanju kako bi izgradili bolju i perspektivniju budućnost, ali i pozitivno okruženje za sve nas.



## Obilježavanje 18. godišnjice Fondacije Hastor

Povodom osamnaestogodišnjeg djelovanja Fondacije Hastor u aprilu 2024. godine godišnjicu smo obilježili na poseban način nastojeći fokus usmjeriti na ono po čemu je naš rad od samog početka prepoznatljiv. Godinama unazad, naše godišnjice obilježavali smo s našim stipendistima gradeći nova prijateljstva i povezujući mlade ljude iz cijele Bosne i Hercegovine pa je tako bilo i ovoga puta. Osim toga, sretni smo što možemo istaknuti da smo 18. godišnjicu obilježili i sastankom Alumni kluba Fondacije Hastor na kojem smo okupili i veliki broj alumnista Fondacije Hastor.

U želji da radost punoljetstva podijelimo s našim studentima stipendistima, za njih smo, tradicionalno, priredili prigodan program, a ovaj put svečanost smo odlučili održati u prostorijama ASA Instituta. Posebnu čar druženju dali su naši stipendisti koji su nas sve zajedno počastili svojim talentima te je čarobnim zvucima svoje violine stipendistica Anja Udovčić na najljepši način otvorila ovu svečanost. Gracioznim plesom i elegancijom naša stipendistica Iman Nur Smailbegović ostavila je poseban dojam i našoj svečanosti dala poseban pečat, dok je Ivan Rajić, naš talentovani muzičar, u veselom tonu svojom pjesmom zatvorio naše druženje.





Ovoga puta druženje stipendista iskoristili smo kao priliku da i simboličnom zahvalnicom nagradimo njihovo dosadašnje nesebično zalaganje. Iz tog razloga, na mjesečnom sastanku studenata dodijeljeno je 20 zahvalnica za naših 20 najboljih volontera, a oni, poredani abecednim redom, su:

1. **Begić Adelisa**, Jajce
2. **Bojanić Maja**, Derventa
3. **Džihan Irma**, Sarajevo
4. **Đapo Lejla**, Sarajevo
5. **Đuderija Samra**, Sarajevo
6. **Ferati Selma**, Sarajevo
7. **Hasanović Iman**, Sarajevo
8. **Hodžić Amela**, Busovača
9. **Hodžić Sedina**, Lukavac
10. **Horić-Šabić Lamija**, Zenica
11. **Karić Dina**, Sarajevo
12. **Karić Venesa**, Zenica
13. **Keserović Sara**, Sarajevo
14. **Korjenić Azra**, Goražde
15. **Lazić Iva**, Tuzla
16. **Lipovac Irma**, Konjic
17. **Marijanović Jana**, Kakanj
18. **Šahbaz Edin**, Maglaj
19. **Velagić Amar**, Bugojno
20. **Vrtagić Ibrahim**, Živinice





## Objavljen Konkurs za najbolje likovne radove i uručene nagrade za najbolje mlade umjetnike


Fondacija Hastor je i u školskoj i akademskoj 2023/2024. godini odlučila nagraditi najtalentiranije stipendiste objavivši Konkurs za najbolje likovne radove. Konkurs je bio organiziran za studente i učenike srednjih škola pa su, samim time, i nagrade bile podijeljene u dvije kategorije. U kategoriji studenata prvo mjesto pripalo je **Aiši Avdić**, a njena nagrada je Samsung Galaxy S23, drugo mjesto osvojila je **Elma Sarajlić** osvojivši Lenovo Tab M8, a treće mjesto zauzela je **Merima Pajalić** osvojivši Tesla TV 32E310BH.

U kategoriji učenika srednjih škola prvo mjesto pripalo je **Denisi Žarkušić**, a njena nagrada je Samsung Galaxy A33 5G, drugo mjesto osvojila je **Naida Omerović** osvojivši Lenovo Tab M8, a treće mjesto zauzela je **Sadika Fišić** osvojivši Lenovo Tab M8.





### *Pobjednički radovi u kategoriji studenti*



**1. Aiša Avdić**




**2. Elma Sarajlić**




**3. Merima Pajalić**

### *Pobjednički radovi u kategoriji srednja škola*



**1. Denisa Žarkušić**



**2. Naida Omerović**



**3. Sadika Fišić**




## Održan online sastanak Alumni kluba Fondacije Hastor

Današnja Fondacija Hastor zasigurno ne bi bila onakva kakva jeste bez naših alumnista. Iako su završili sa stipendiranjem, njihova povezanost s Fondacijom idalje je izuzetno čvrsta te svojim djelovanjem i danas Fondaciju Hastor prikazuju u najboljem svjetlu. Naši alumnisti nesebično dijele svoja znanja, iskustva i savjete s novim stipendistima, kako kroz Podcast Fondacije Hastor tako i kroz brojne druge aktivnosti.

U duhu njegovanja zajedničke saradnje, 17. aprila održana je online sjednica Alumni kluba. Na sjednici je usvojen Poslovnik o radu Alumni kluba, kao i predstavljen nacrt rada koji uključuje definiranje prioriternih aktivnosti i formiranje timova zaduženih za razradu pojedinačnih aktivnosti, čime je potvrđena opredijeljenost naših bivših stipendista da nastave širiti misiju Fondacije Hastor.

Sastanak je bio prožet nostalgijom za prethodnim danima, ali i velikim entuzijazmom za dalji nastavak kvalitetnog prijateljstva i saradnje s Fondacijom Hastor. Izuzetno smo ponosni na volju i želju naših alumnista da nastavimo djelovati zajedno te se silno radujemo našim budućim aktivnostima.







## *Punoljetstvo Fondacije Hastor u znaku dobročinstva*

Kao i prošle godine u mjesecu aprilu, tako i ovoga puta, naše volonterske grupe u cijeloj Bosni i Hercegovini postavile su nove standarde u procesu volontiranja. U okviru projekta *Punoljetstvo Fondacije Hastor u znaku dobročinstva* naši volonteri organizirali su veliki broj aktivnosti širom Bosne i Hercegovine čiji je cilj bio poboljšati i unaprijediti zajednice u kojima žive.

Ponosni smo na naše stipendiste koji nesebično pružaju ruku onima kojima je ona potrebna, šire svoju humanost i postaju uzorni članovi svoje zajednice u svim segmentima. Mjesec april obilježen je raznim aktivnostima, a samo neke

od njih su čišćenje i uljepšavanje javnih površina, izrada kartica s afirmacijskim porukama za građane, izrada hranilica za životinje u školskim dvorištima, ekološke akcije, posjete udruženjima za djecu s poteškoćama u razvoju, izrada slikovnica za djecu oboljelu od raka, humanitarne akcije i volontiranje u humanitarnim udruženjima, posjete staračkim domovima, pomoć starim i iznemoglim licima i dr.





## *Predavanje prijatelja iz Deloitte-a za studente stipendiste – ESG i njegova važnost za budućnost poslovanja*

Predavanje za stipendiste Fondacije Hastor, studente pravnih, ekonomskih i srodnih fakulteta, održano je ove godine. Naša gošća Merima Hrapović, viša konsultantica u društvu Deloitte, za naše stipendiste održala je predavanje o temi ESG-a tokom kojeg je istakla ključne aspekte ESG-a i njegovu važnost za budućnost poslovanja.

Naša gošća potrudila se da temu na najbolji način približi našim studentima, a upoznavanje s ovom temom pružilo im je dragocjene uvide u nefinansijsko izvještavanje i održivi razvoj. Studenti su imali priliku saznati kako ESG izvještavanje može utjecati na poslovne strategije i kako mogu primijeniti ove koncepte u svojoj budućoj karijeri, a znanje stečeno tokom predavanja može studentima pružiti konkurentsku prednost na tržištu rada i pripremiti ih za uspješnu karijeru u savremenom poslovnom okruženju.





## Ljetni raspust u Holandiji 2024.

Godinama smo svjedoci kako Fondacija Hastor kroz projekt *Ljetni raspust u Holandiji* svojim stipendistima pruža priliku da stvaraju posebne i nezaboravne uspomene. Ove je godine Fondacija Hastor u saradnji s holandskom organizacijom *Stichting Kinderhulp Bosnië* stipendistima Asmiru Omerdiću i Tajani Salkić pružila priliku da otputuju u Holandiju i okušaju se u ulozi pratnje djeci koja su u okviru ovogodišnjeg projekta *Ljetni raspust u Holandiji* posjetila ovu predivnu zemlju. Oboje su se složili kako je ovo za njih bilo posebno iskustvo tokom kojeg su naučili ponešto o djeci, ali i o sebi samima. Testirali su svoje organizacijske vještine, snalažljivost, ali i veliku odgovornost – brigu o 20 učenika.

*Ovo putovanje podsjetilo me na važnost spontanosti i uživanja u trenutku. Kroz interakciju s drugim ljudima, ali i djecom, naučio sam vrijedne lekcije o strpljenju, kreativnosti i prilagodljivosti.*

Asmir i Tajana potrudili su se da ovo putovanje učine nezaboravnim, misleći na svaki detalj, te su vrijeme nerijetko provodili boraveći na svježem zraku i organizirajući piknike. Naši stipendisti svoje putovanje sročili su u nekoliko riječi, dovoljno značajnih da iskažu očaranost tim putovanjem:

*Projekt u Holandiji bio je izuzetno raznovrstan i ispunjavajući. Uspjeli smo stvoriti uspomene koje ćemo svi dugo pamti. Ova će mi iskustva sigurno pomoći u budućim projektima i izazovima.*





## Održana druga redovna sjednica Skupštine Alumni Kluba Fondacije Hastor

U subotu, 21. septembra 2024. godine, održana je druga redovna sjednica Skupštine Alumni kluba Fondacije Hastor, gdje su se još jedanput okupili bivši stipendisti i prijatelji u toplom okruženju ASA Instituta u Sarajevu. Sjednicu je otvorila predsjednica Skupštine Alumni kluba Fondacije Hastor Marizela Hadžić koja je zajedno s Eminom Sijahović, zamjenicom predsjednice, i Alemom Merdićem, sekretarom, najavila buduće aktivnosti i plan njihove realizacije te je usvojen izvještaj o radu za prethodnu te plan i program za narednu godinu.

***Iako je prošla tek godina dana od osnivanja Skupštine Alumni kluba Fondacije Hastor, mogu kazati da se iznimno radujem svemu što nas čeka u budućnosti. Nakon usvajanja Zapisnika s prethodne sjednice i Godišnjeg izvještaja o radu Alumni kluba, predstavili smo plan aktivnosti za narednu godinu. Sve aktivnosti vodit će članovi Skupštine i vjerujem da nas u budućnosti čeka mnoštvo lijepih priča na koje ćemo biti ponosni,*** istakla je predsjednica Skupštine Marizela Hadžić.



Bila je ovo prilika da se prisjetimo svih zajedničkih trenutaka i uspjeha koje smo postigli, ali i da podijelimo iskustva i nove ideje o aktivnostima koji nas čekaju u budućnosti. Sjednica je bila izuzetno produktivna i svi su prisutni članovi Skupštine aktivno učestvovali i iznijeli mnogo korisnih ideja kako da u narednoj godini Alumni klub organizira što više aktivnosti. Svi članovi Alumni kluba svjesni su važnosti inspirativnog i motivirajućeg okruženja kojeg njima, a ni sadašnjim stipendistima Fondacije Hastor nikada nije manjkalo.

Posebno se radujemo svakoj narednoj sjednici Alumni kluba, gdje ćemo, kao i dosad, u pozitivnom ozračju promovirati našu misiju i čuvati prijateljstva koja su se razvila tokom svih ovih godina.





# Podcast Fondacije Hastor

Pozitivne i inspirativne priče iz Fondacije Hastor i ove godine pronašle su svoj put do javnosti zahvaljujući našem Podcastu. Imali smo čast razgovarati s uspješnim mladim ljudima, bivšim stipendistima Fondacije Hastor. Njihove životne priče su motivirajuće, pune izazova, važnih odluka i velikih pobjeda. Ove priče nesebično su podijelili s pratiocima Podcasta Fondacije Hastor.

Prema povratnim reakcijama, uspjeli smo motivisati veliki broj mladih ljudi. Naši gosti u njima su probudili hrabrost, želju za napretkom i izgradnji bolje budućnost za sve nas. To je sve ono što smo i željeli postići i ponosni smo da samo i uspjeli. Spojili smo istinske životne vrijednosti i obrazovanje s globalnim digitalnim trendovima i napravili priču koja je promjenila mnoge poglede.

I ove godine, naš podcast je realiziran zahvaljujući najvećoj pokretačkoj snazi Fondacije Hastor, onima koji najbolje osjećaju vrijednosti i značaj Fondacije Hastor jer su i sami bili dijelom nje. Jedna od takvih je i naša alumnistica, voditeljica podcasta Dženana Zulum koja o ovom velikom projektu ponosno govori:

*Podcast Fondacije Hastor je zaista jedna posebna priča. Od kako smo pokrenuli podcast, fokus nam je na promociji lijepih životnih vrijednosti, inspirativnih priča i motivaciji mladih ljudi. Više puta smo se uvjerali da u tome i uspjevamo što me čini jako ponosnom. Naši gosti su sjajni mladi ljudi s kojima sam uživala razgovarati i koji su najbolji primjer uspjeha u Bosni i Hercegovini. Moguće je, a mi to i dokazujemo.*





# Mentorski program

**Fondacija Hastor zvanično započela mentorski program "Prvi korak u poslovni svijet"**

Zvanično je započeo mentorski program Fondacije Hastor „Prvi korak u poslovni svijet“. Ovaj vid podrške stipendistima novina je u Fondaciji Hastor, a studenti stipendisti imaju jedinstvenu priliku dobiti mentorsku podršku stručnjaka iz oblasti srodnih oblastima njihovih studija ili onoga čime se žele baviti u budućnosti, a koja obuhvata: nova znanja, edukacije, iskustva, savjete, prilike, motivaciju, umrežavanje, jačanje vještina, razvoj ličnosti i, pored svega, moralnu podršku. Studenti će, uz razvoj vještina, unaprijediti svoje kompetencije potrebne za tržište rada: sposobnost analitičkog razmišljanja, aktivno učenje, kreativnost, kritičko promišljanje itd.

Priliku za učešće u prvom ciklusu mentorskog programa dobile su stipendistice Fondacije Hastor koji se ističu svojim fakultetskim uspjehom, predanošću volonterskom angažmanu u Fondaciji Hastor te željom za učenjem i sticanjem novih vrijednih iskustava.



Mentorski program podržan je od naše ASA Grupacije i njene članice ASA Bolnice, čiji će se uposlenici, vrsni profesionalci u svojim oblastima, naći u ulozi mentora našim stipendistima i tako nesebično prenijeti svoje znanje, vještine i iskustvo našim stipendistima. Zahvaljujemo ASA Grupaciji i ASA Bolnici na podršci te svim učesnicima želimo uspješnu realizaciju aktivnosti u okviru mentorskog programa.



# Uspjesi stipendista



Vrijedna stipendistica **Lejla Bolukbaši** u velikoj porodici Fondacije Hastor je već dvije godine. Zanimljivo je istaći da je ona učenica osnovne škole, a nanizala je neke izuzetno zavidne rezultate. Naša je Lejla učenica devetog razreda i njena strast prema znanju ne poznaje granice. Od malih nogu, pored uspjeha u okviru nastavnih predmeta u školi, Lejla je aktivno učestvovala i na raznim takmičenjima. Posebnu ljubav gaji prema turskom jeziku, što se može uočiti njenim uzastopnim učešćem i rezultatima na kantonalnim takmičenjima iz navedenog predmeta.

Trenutno je zaokupljena pripremanjem za buduća kantonalna takmičenja koja je čekaju. Već pet godina aktivna je članica muzičkog hora u svojoj školi. Pored svih navedenih aktivnosti, Lejli nije strano ni pojavljivanje u medijima, pa je, s tim u vezi, nekoliko puta učestvovala u radijskim i televizijskim emisijama.

*Status stipendistice Fondacije Hastor nije samo prilika za lijepo druženje već i izvor neprocjenjivog iskustva koje će mi biti od pomoći u budućnosti. Za mene Fondacija Hastor nije samo finansijska podrška, već i ključni faktor prema budućem uspjehu.*



Naša vrijedna stipendistica **Amina Bašić** svojim uspjesima iz dana u dana nadmašuje samu sebe. Dolazi iz Hadžića, pored Sarajeva, a trenutno pohađa treću godinu studija na Filozofskom fakultetu Univerziteta u Sarajevu – na Odsjeku za bosanski, hrvatski i srpski jezik i na Odsjeku za književnosti naroda Bosne i Hercegovine. Autorica je nekoliko stručnih tekstova iz oblasti filologije i lingvistike te političkih i pravnih nauka koji su objavljeni u printanim i elektronskim časopisima. U novembru 2022. godine objavljen je i njen prvi naučnoistraživački rad iz oblasti diplomatije. Pored toga, Amina je angažirana i na prevodenju i digitalizaciji korpusa starih tekstova. Ne posustaje ni na kakvom polju, te pored aktivnog bavljenja diplomatijom, bavi se i liderskim, prezentacijskim i retoričkim vještinama, iz kojih je završila nekoliko obuka, ali i sama drži obuke iz ovih oblasti. Nije naodmet istaći i da je bila predavačica, govornica, kao i učesnica na raznim konferencijama. Amina je u mjesecu oktobru prošle godine boravila u Kini i bila predstavnik BiH na omladinskom kampu *Northeast Asia Youth Camp on Sustainable Development 2023 Fujian*. Bila je jedna od dva predstavnika iz Evrope. Ističući se svojim vrlinama, neumornom radu i zalaganju, nije nikakvo čudo što se upravo ona našla na ovoj listi.

*Moram kazati da sam izuzetno ponosna što imam priliku i u praksi primijeniti sve ono što učimo na studiju i za šta se osposobljavamo. Lektorski posao kroz redakciju Fondacije Hastor veoma je zahtjevan, ali simultano osjećam ogromno zadovoljstvo što baš u tom spektru mogu doprinijeti radu Fondacije.*





**Mustafa Puljarga** dolazi iz Gornjeg Vakufa, malog grada na izvoru Vrbasa. Prva je godina Mašinskog fakulteta u Mostaru i stipendista je Fondacije Hastor osam godina tokom kojih je naučio mnogo toga. Mustafa je još od mladih dana pokazivao privrženost volonterizmu i jednostavno želi za postizanjem nečega boljeg. U svojim srednjoškolskim danima bio je član Asocijacije srednjoškolaca gdje se zalagao za prava učenika. Doprinos zajednici tu se nije zaustavio, pa je na većem akademskom stepenu postao dio Naučno-nastavnog vijeća Mašinskog fakulteta u Mostaru u kojem je zagovarao bolji studentski status. Svoju empatiju proširio je i na Mrežu mladih Gornjeg Vakufa. Aktivan je član Unije studenata Univerziteta u Mostaru, gdje učestvuje u organiziranju studentske lige zahvaljujući dobrim organizacijskim vještinama koje je stekao u Fondaciji Hastor. Na fakultetu je sa svojim kolegama dobio priliku za odlazak na takmičenje *Design Megdan*, u organizaciji *Intera* tehnološkog parka. Njihov je zadatak bio da kroz timski rad izrade maketu vozila. Mustafa je zajedno sa svojim timom osvojio drugo mjesto, što ga je dovelo do dvomjesečnog boravka na praksi u preduzeću *Alfa Therm*.

Zanimljiva činjenica u vezi s Mustafom jeste ta da mu je u svemu navedenom motivacija ljubav prema domovini. Želja mu je biti izvrsnim ambasadorom naše zemlje, zahvaljujući čijim će uspjesima mnogi čuti za Bosnu i Hercegovinu.

*Obaveze koje imam u Fondaciji Hastor naučile su me odgovornosti. Shvatio sam da kao pojedinac mogu pomoći, uraditi nešto korisno i naučiti usput mnogo novih i važnih stvari. Stoga, želim zahvaliti Fondaciji koja kao bedem stoji iza nas i pomaže*



Iako ima samo 15 godina, **Ema Sarić** je itekako uspješna u svijetu glume i stvaranju vlastitih filmova. Još je sa svojih pet godina prvi put učestvovala na *Film Festivalu* u Dubrovniku, gdje je bila najmlađa glumica. Devet godina kasnije, odnosno u 2023. godini pobijedila je na svjetskom *FIFES* festivalu. Naime, na njemu je od prijavljenih 14.000 filmova stručni žiri upravo Emin proglasio najboljim. Dalje, na Film Festivalu u Gruziji pod nazivom *OQROS PEPELA* izabrana je za najbolju glumicu. Osim toga, bila je i finalistica festivala *Student World Impact Film Festival*, a dobila je i specijalnu nagradu na festivalu pod nazivom *Cinemaking International Film Festival*.

S obzirom na to da je ambiciozna, uporna i talentirana, raduje se što je dio Fondacije Hastor, a Fondacija oduvijek i traga upravo za takvim ljudima – vrijednim, upornim i onima koji se trude i postavljaju visoke ciljeve.

*Čast i zadovoljstvo mi je da sam dio ove velike i, nadasve, plemenite porodice, a s obzirom na to da Fondacija Hastor podržava i unapređuje rad mladih talenata, preuzimam odgovornost za dalji razvoj, napredak i unapređivanje sebe i svojih vještina.*




**Tarik Dacić**, učenik drugog razreda Druge gimnazije u Sarajevu pravi je uzor izvrsnosti i posvećenosti u obrazovanju i istraživanju. Njegovi odlični školski rezultati, s prosječnom ocjenom 5.00, kao i strast prema prirodnim naukama, programiranju i stranim jezicima ističu ga među vršnjacima. Kao ponosni stipendista Fondacije Hastor Tarik ne samo da ostvaruje akademske uspjehe već i aktivno sudjeluje u raznim projektima i takmičenjima. Njegova dostignuća uključuju zlatne medalje na međunarodnoj STEM olimpijadi u Hagu, kao i brojne uspjehe na matematičkim takmičenjima na lokalnom, regionalnom i međunarodnom nivou. Tarikova posvećenost nauci i obrazovanju inspiracija je za sve mlade ljude.

*Fondacija Hastor, pored finansijske podrške, pruža nam nove prilike i otvara nove vidike te čini sve da nas uključi što više u svakodnevna dešavanja u zajednici i da nam pomogne u ostvarenju naših snova.*



Premda ima 17 godina, **Asmira Kunić** se uspjela odvažiti i otisnuti u svijet kako bi pokazala svoja umijeća i vještine. Godina 2024. za nju ima poseban značaj. Naime, od 26. do 29. septembra 2024. godine imala je priliku Bosnu i Hercegovinu predstavljati na Međunarodnoj robotičkoj olimpijadi u Atini, u organizaciji *First Global Challenge*. Od 190 država koje su učestvovala na Olimpijadi tim Bosne i Hercegovine osvojio je tri nagrade: jednu *Social media award* i dvije *Video storytelling awards*. Po povratku iz Atine tim Bosne i Hercegovine dočekala je federalna ministrica

*Veoma sam zahvalna i sretna jer sam dobila priliku predstaviti državu na ovako prestižnom takmičenju te, naravno, pokazati svoje znanje i naučiti nešto novo. Svakako, sve ono što sam naučila u Fondaciji Hastor pratilo me je kroz cijelo takmičenje – biti i ostati dobar čovjek i prijatelj, ma gdje se nalazila.*





# Vannastavne aktivnosti stipendista

**Layla Jusko**



**Layla Jusko** živi u Sarajevu i četvrta je godina Fakulteta političkih nauka i međunarodnih odnosa na Univerzitetu SSST. Kako je u Fondaciji Hastor spoznala da onaj koji najviše uči i istražuje može doprinijeti zajednici i da uvijek treba raditi na sebi – i formalno i neformalno – svoje slobodno vrijeme provodi istražujući sfere populacijskog razvoja, javnog zdravlja i klimatskih promjena. Također je izvršila istraživanje u vezi s karcinomom dojke i grlića maternice, pa ju je Institut Karolinska i UNFPA (United Nations Population Fund) Regionalnog ureda za istočnu Evropu i centralnu Aziju proglasio jednom od najboljih istraživačica u sferi populacijskog razvoja i reproduktivnog zdravlja u široj Evropi. Godine 2023. organizirala je prvu UNFCCC (United Nations Framework Convention on Climate Change) konferenciju mladih. Osim toga, predstavljala je mlade Bosne i Hercegovine na Internacionalnoj konferenciji za populacijski razvoj (ICPD30) u Ženevi te na COP28 (Conference of the Parties) unutar delegacije Bosne i Hercegovine.

***Budite radoznali, hrabri i otvoreni za neprestano učenje jer upravo u tom procesu leži ključ za ostvarivanje vaših najvećih potencijala.***

**Venesa Karić**



**Venesa Karić** dolazi iz Zenice, gdje je završila osnovnu i srednju školu. Studira na Internacionalnom Burch Univerzitetu u Sarajevu, na Fakultetu za edukaciju i humanističke nauke – smjer Digitalne komunikacije i odnosi s javnošću. U Fondaciji Hastor volontira kao vođa tima za društvene mreže, što joj daje priliku implementirati stečeno znanje na fakultetu. Pohađala je različite programe neformalnog obrazovanja, a neki od njih jesu: SHL Akademija za mlade lidere i liderke u civilnom društvu, AFW Akademija političke pismenosti mladih u BiH, obuka za pisanje BOLD projekata *Be Bold It's Up To You* (YIHR i VII academy) te *Stay Bold (Youth Power)*. U 2023. godini bila je jedan od dobitnika BOLD granta, zahvaljujući kojem je u maju 2024. godine realiziran projekat *CareerLeap Summit*. U sklopu prakse u *EUConsultu* posjetila je i Brisel kao učesnica u studijskoj posjeti različitim institucijama i organizacijama kao što su *Ceplis* i *EESC*. Firmu *Taskovski Films Ltd.* predstavljala je na Sarajevo Film Festivalu. Pored svega toga, Venesa je kreirala i svoj prvi autobiografski dokumentarni film *The Time Is Now*, koji je prikazan u sklopu KreativFesta Internacionalnog Burch Univerziteta, a zasnovan je na njenoj plesnoj priči.

***Mladima bih poručila da iskoriste sve benefite volonterskog angažmana i da neumorno traže prilike oko sebe kojih, svjedok sam, zaista ima mnogo. Zahvaljujući volonterskom angažmanu, dobila sam priliku za pohađanje željenog fakulteta, proputovala mnogo, upoznala različite kulture, stekla neprocjenjiva prijateljstva i poznanstva, što za mene predstavlja najveće bogatstvo.***

## Uma Kalajdžisalihović



**Uma Kalajdžisalihović** ima 11 godina i završila je peti razred osnovne škole odličnim uspjehom (prosjek 5.0) i primjernim vladanjem. Biti odličan učenik s primjerenim vladanjem znači biti uzor i u školi, i van nje. Kako je njena najveća ljubav ritmička gimnastika, koju aktivno trenira od šeste godine u Klubu ritmičko-sportske gimnastike *Olimpik*, u proteklom je periodu učestvovala na domaćim i međunarodnim takmičenjima u individualnim i grupnim vježbama u programu A i ostvarila značajne rezultate. Na 21. *Olimpik Cup 2024* osvojila je prvo mjesto u individualnom programu bez rekvizita i dobila zahvalnicu za uspješnu prezentaciju ritmičke gimnastike i za nesebičan doprinos u razvoju i afirmaciji ritmičke gimnastike. Zatim, na prvom *Vindija* kupu u Varaždinu osvojila je prvo mjesto u individualnom programu bez rekvizita. Ovo su samo neki od Uminih uspjeha i vjerujemo da ju još mnogi čekaju u budućnosti.

*Fondacija Hastor za mene predstavlja mnogo više od finansijske podrške. Kroz njihovu stipendiju, dobila sam priliku da se obrazujem i razvijam, ali i osjećaj da neko vjeruje u moj potencijal i moj uspjeh. Podrška Fondacije mi omogućuje da izgradim samopouzdanje, da ulažem u sebe i svoje znanje i da ostvarim svoje profesionalne ciljeve.*

## Vuk Solaković



**Vuk Solaković** volontira u timu u MZ Janja, u Bijeljini. U slobodno vrijeme trenira šah i kik-boks, a donedavno je trenirao i fudbal. Protekla je godina bila veoma značajna za njega budući da je ostvario različite uspjehe. Naime, zauzeo je drugo mjesto na Kadetskom prvenstvu RS u šahu (klasik) i na Seniorskom prvenstvu RS u šahu (klasik – mlađi seniori), dok je bio trećeplasirani na Kadetskom prvenstvu RS u šahu (ubrzani), na Međunarodnom kadetskom šahovskom turniru u Beogradu (ubrzani) te na Međunarodnom šahovskom turniru povodom Dana državnosti BiH (ubrzani). Osim toga, učestvovao je na Kadetskom prvenstvu BiH u šahu (klasik) te je proglašen za sportistu generacije kao maturant JU Osnovne škole Sveti Sava u Bijeljini.

*Fondacija Hastor je izuzetno važna organizacija koja pruža značajnu podršku uspješnim učenicima jer im ne pomaže samo finansijski već ih i motivira da se nastave baviti sportom koji vole i da se nastave isticati u školi. Ova podrška omogućava mladima da se fokusiraju na svoje ciljeve, bilo da je riječ o postizanju odličnih rezultata u školi ili o usavršavanju u sportu. Zahvaljujući Fondaciji Hastor pružena mi je prilika da nastavim sa svojim sportskim i obrazovnim ambicijama.*



## Emina Hodžić



**Emina Hodžić** će 2023. godinu pamtiiti po različitim uspjesima. U decembru 2023. godine dobila je *Grand Gold* medalju i stipendiju za Internacionalni Burch Univerzitet na Bosanskoj naučnoj olimpijadi na projektu *SafeTrack*. Riječ je o projektu koji koristi AI tehnologiju za praćenje sigurnosti i sprečavanje nesreća u saobraćaju. Kasnije je istim projektom osvojila srebrnu medalju na *Infomatrix* takmičenju u Rumuniji te bronzanu medalju na Internacionalnoj Greenwich olimpijadi u Londonu. Ove je godine po drugi put osvojila prvo mjesto na Ekonomskoj olimpijadi Bosne i Hercegovine i predstavljat će BiH na Međunarodnoj olimpijadi u Grčkoj. Osim toga, u septembru 2023. godine osvojila je 16. mjesto i najbolji plasman ikada za Bosnu i Hercegovinu na Internacionalnoj ekonomskoj olimpijadi. Učestvovala je i na Federalnom takmičenju iz matematike.

*Uvijek težite svojim ciljevima, bez obzira na prepreke koje se pojave na putu. Važno je vjerovati u sebe, raditi marljivo i ne odustajati. Svaka je prepreka prilika za učenje i rast, a uz dovoljno truda i upornosti sve je moguće.*

## Hamza Turulja



**Hamza Turulja** je stipendista Fondacije Hastor tri godine i svoj doprinos daje volontirajući u timu za društvene mreže. Student je Fakulteta sporta i tjelesnog odgoja u Sarajevu. Ljubav prema sportu iskazuje i na fakultetu i izvan njega, što pokazuje činjenica da je dugi niz godina dio karate reprezentacije Bosne i Hercegovine te da je u 2023. godini uspio odbraniti titulu državnog prvaka, postati ekipni viceprvak Francuske, osvojiti srebrnu medalju na Evropskim univerzitetskim igrama te upisati mnogo ekipnih i pojedinačnih uspjeha. S obzirom na brojnost Hamzinih uspjeha, jedan Godišnji izvještaj je malo prostora kako bismo ih sve nabrojali, a vjerujemo da će i još mnoge i značajnije steći u budućnosti. U slobodno vrijeme voli planinariti i biti u prirodi.

*Mladim bih ljudima poručio da ne očekuju da će rezultati doći preko noći i da se ne obeshrabre kada stvari ne budu išle onako kako su zamislili. Sportskim žargonom rečeno, život je maraton, a ne sprint, tako da svi ti usponi i padovi samo grade naš karakter i pomažu da ojačamo.*



**Ada Avdagić** je stipendistica Fondacije Hastor šest godina. Volontira u timu za srednjoškolce. Osim što je uspješna učenica, Ada se istakla i u sportskoj sferi. Tako je u 2023. godini u taekwondou osvojila zlatnu medalju na kvalifikacijama za Evropske igre i predstavljala BiH na tom planetarno prestižnom događaju. Isto je tako osvojila bronzanu medalju na Evropskom prvenstvu u olimpijskim kategorijama, zatim na Evropskom seniorskom prvenstvu te na Evropskom klupskom prvenstvu. Pored toga, bila je na desetak internacionalnih takmičenja i osvojila zlatne, srebrene i bronzane medalje. To nas i ne čudi s obzirom na to da je Ada član BiH taekwondo reprezentacije već osam godina, državna prvakinja i ima priznanje vrhunskog sportiste.

*Uvijek slijedite svoje snove. Ne odustajte čak i ako doživite poraz. Svaki je poraz lekcija, pa je važno samo nastaviti dalje.*



**Afan Vehabović** je stipendista Fondacije Hastor koji volontira u timu za srednjoškolce. Slobodno vrijeme provodi svirajući klavir, čitajući knjige, crtajući te družeći se sa svojim prijateljima. Ljubav prema svemu navedenom pokazuju njegovi uspjesi iz tih disciplina. Naime, u 2023. godini je na literarnom konkursu povodom Dana državnosti osvojio treće mjesto za srednje škole. Također, na literarnom konkursu u okviru federalne manifestacije *Dani Isaka Samokovlije – Sunce nad Drinom* osvojio je treće mjesto za radove učenika srednjih škola. Trećeplasirani je bio i na Kantonalnom takmičenju iz matematike za srednje škole. Pored toga, na Kantonalnom takmičenju iz Njemačkog jezika za srednje škole osvojio je prvo mjesto, pa je, samim time, bio učesnik Državne olimpijade njemačkog jezika koja se održala u Sarajevu. Što se tiče muzike, na Internacionalnom pianističkom takmičenju u Smederevu, u Srbiji, u svojoj kategoriji osvojio je maksimalnih 100 bodova te je postao laureat svoje kategorije.

*Budite uporni u onome što volite raditi. Svaki se trud na kraju isplati. Budite hrabri i ostvarit ćete svoje ciljeve.*



# Predstavljajte diplomanata i magistranata 2023/2024.

## DIPLOMANTI



Alić Elma  
Avdić Aiša  
Basarik Amina  
Bašić Amina  
Begić Adelisa  
Begović Ilvana  
Behlil Nudžejma  
Buza Aida  
Čolić Nermina  
Čomor Adna  
Čosić Biba  
Delić Enita  
Dizdarević Selma  
Đuhera Đenita  
Džajić Nedim  
Džihan Irma  
Džinalić Amina  
Fermić Lejla  
Gološ Selma  
Hadžimuratović Ajlla  
Hindić Alma  
Hodžić Aldijana  
Hodžić Amel  
Hodžić Merjema  
Hodžić Sedina  
Huseljić Elmina  
Ibišević Almira  
Ibrahimović Almedina  
Ibrahimović Saida  
Ibrahimović Šeherzada  
Ibričić Maja  
Josipović Aleksandar  
Julardžija Aldin  
Jusić Ilvana  
Jusko Layla  
Karabašić Amar  
Karić Elma  
Karić Venesa

Kevrić Aida  
Klapić Eldar  
Klepić Kenan  
Kopić Sevla  
Korjenić Azra  
Kulenović Emina  
Lazić Iva  
Mehaković Didić Melisa  
Mešić Arnela  
Mešinović Imran  
Mujčin Aida  
Mujkić Ermin  
Mulahasanović Azar Alija  
Ogrešević Ilma  
Petak Hajder  
Pljakić Nejla  
Puzić Emina  
Reč Marika  
Resić Anesa  
Salčin Merjema  
Salihović Lejla  
Sarajlić Elma  
Sažić Selmina  
Selimović Hadžera  
Sinanović Almedin  
Smajić Džejlana  
Smajlović Edna  
Smajlović Melisa  
Softić Ismet  
Spahić Amina  
Stanar Nikolina  
Šahović Amina  
Tabaković Bilajbegović Emina  
Turić Minela  
Tursunović Belmina  
Turulja Hamza  
Zenkić Emina



## Aleksandar Josipović



Aleksandar je završio osnovne studije na Akademiji umjetnosti Univerziteta u Banjoj Luci na smjeru Muzička teorija i pedagogija s prosječnom ocjenom 9,93. Time je stekao zvanje diplomiranog profesora muzičke teorije i pedagogije. Tokom školovanja i studiranja učestvovao je na mnogim takmičenjima, kako horskim tako i u disciplini solo klavir. Posebno izdvaja osvojenu drugu nagradu na takmičenju pijanista u Smederevu pod nazivom ULjUS. Na osnovu visokog prosjeka i položenih ispita vršio je i ulogu demonstratora na predmetu Harmonija. Nakon završenih studija planira nastaviti školovanje te upisati master također na Akademiji umjetnosti Univerziteta u Banjoj Luci na smjeru Muzička teorija.

*Još od srednje škole Fondacija Hastor je uz mene i prati sve moje uspjehe koje sam postigao tokom školovanja. Pored finansijske podrške, Fondacija Hastor mi je otvorila neke nove vidike u životu i pomogla da odrastem i izgradim sebe kao uspješnu ličnost. Kroz mjesečna volontiranja i druženja, upoznao sam nove prijatelje s kojima se i dan-danas družim, a samim tim sam radio i na razvijanju svoje lokalne zajednice. Zahvalan sam Fondaciji i najmanje što mogu reći jeste da je čast biti dio velike porodice koja svake godine sve više raste.*

## Emina Zenkić



Emina Zenkić dolazi iz Prijedora i diplomirala je na Prirodno-matematičkom fakultetu Univerziteta u Sarajevu na Odsjeku za biologiju, smjer Biohemija i fiziologija. Stipendista je Fondacije Hastor već 10 godina. U toku svog studiranja učestvovala je u različitim naučnim kongresima, kao i BHAAAS ljetnoj školi za studente biologije. Zbog svog prosjeka bit će dobitnica Srebrene značke Univerziteta u Sarajevu. Trenutno je upisana na master studij iz iste oblasti na Prirodno-matematičkom fakultetu UNSA.

*Fondacija Hastor je uz mene kroz čitavo moje srednjoškolsko i fakultetsko obrazovanje. Zahvaljujući stipendiji ne samo da sam napredovala u obrazovanju već sam imala priliku da se uključim u volonterske aktivnosti i doprinesem svojoj lokalnoj zajednici te razvijem mnoštvo novih vještina. Vaša podrška bila je ključna ne samo u mom ličnom razvoju već i u jačanju zajednice kojoj pripadam.*



# Predstavljanje diplomanata i magistranata 2023/2024.

## MAGISTRANTI



Abdelaziz Ahmed Hassan Aiša  
Ahmetović Fahira  
Bečirović (Karaosmanović) Emira  
Bureković Faris  
Čavčić Elvira  
Duranović Edvina  
Ergun Neyla Yasemin  
Gagić Nikolina  
Grafo Nejla  
Hadžo Harun  
Hajrić Hana  
Hasić Lejla  
Hindija Nejra  
Horić-Šabić Lamija  
Imamović Nadira  
Jakubović Fikreta  
Jelić Gabriel  
Jusupović Muharem  
Kenjić Ivona  
Komarac Lejla  
Korman Zerina  
Kvesić Marijana  
Marijanović Jana  
Mehmedagić Enisa  
Merdić Fadil  
Mulaomerović Anes  
Nukić Emina  
Osmanović Merima  
Osmanović Amina

Pirić Dževad  
Sadiković Senida  
Sarajčić Emir  
Sejđinović Dženan  
Selimović Esmina  
Smajić Elma  
Suljević Nejla  
Šaljić Aldina  
Škrgić Mirzet  
Višća Amina  
Viteškić Dženana  
Zahirović Fatima



## Nejla Suljević



Nejla Suljević dolazi nam iz Brčkog, gdje je završila Gimnaziju "Vaso Pelagić", nakon koje 2018. godine upisuje Stomatološki fakultet sa stomatološkim kliničkim centrom u Sarajevu. Diplomirala je u septembru ove godine i time stekla zvanje doktorica dentalne medicine. Studij okončava kao Zlatna značka Univerziteta u Sarajevu.

*Kroz koncept volontiranja u okviru Fondacije Hastor, počevši od mentora učenicima – do člana administrativnog tima, stjecala sam veću želju za pomoć zajednici i okruženju u kome živim. Najveći naglasak pri tome stavljam na razvijanje empatije kao jedne od najvažnijih ljudskih osobina. Odgovornost i humanost predstavljaju srž moje profesije kao stomatologa, te sam sretna što sam imala priliku dodatno raditi na ovim segmentima svoje ličnosti kroz volonterski angažman.*

## Nejla Graho



Nejla Graho, rođena u Sarajevu, ima impresivnu akademsku i sportsku karijeru. Na Nastavničkom fakultetu Univerziteta "Džemal Bijedić" u Mostaru, Odsjek Sport i zdravlje, 2023. godine stekla je diplomu prvog ciklusa, a master studije završila je 2024. godine. Višestruka je dobitnica prestižnih nagrada, uključujući četiri Dekanove nagrade, tri Zlatne plakete Unije studenata, nagrade za najbolje studente Grada Konjica te nagradu Federalnog ministarstva nauka, obrazovanja, kulture i sporta za najbolje studente Federacije BiH. Njen akademski uspjeh obilježen je i Rektorovom nagradom za I ciklus studija. Ljubav prema sportu odvela je na put kojim uspješno korača. Karate trenira već četrnaest godina, a nositeljica je majstorskog zvanja Crni pojas 1. dan. Kao bivša reprezentativka, Nejla je osvajala brojne medalje na državnim prvenstvima, a kruna njenih sportskih postignuća je srebrna medalja na Balkanskim školskim igrama. Pored toga, tokom studija osnovala je Univerzalnu školu sporta „Neretvica“ Gorani i četiri puta organizovala Ljetnu školu sporta u školama u Konjicu i Jablanici. Trenutno je trenerica u Školi atletike Mostar i aktivno učestvuje u projektu „PokreniMO“, gdje vodi treninge za osobe treće životne dobi. Slobodno vrijeme provodi u prirodi, baveći se trčanjem, odbojkom, planinarenjem i treninzima u teretani.

*Stipendistica sam Fondacije Hastor od osmog razreda. Par godina sam bila u ulozi mentorice, dok sam prethodne dvije godine provela u monitoring timu. Obaveze prema Fondaciji, lokalnoj zajednici, školi, sportu i porodici su me naučile kako da na najbolji način organizujem vrijeme i odredim prioritete. Sretna sam što sam više od decenije dio ovog tima.*



# Izjave stipendista i bivših stipendista

*Fondacija Hastor je u potpunosti promijenila moj pogled na život i način života.*

*Fondacija Hastor prvenstveno mi je otkrila nova poznanstva od kojih su dva izrodila najboljim prijateljstvom.*

*Najbitnije je da smo (kroz Fondaciju Hastor) naučili kako biti čovjek i kako se snalaziti u životu u raznim situacijama.*

*Ona je za mene i izvor radosti i zadovoljstva.*

*Fondacija Hastor mi je mnogo značila i pomogla da se izgradim kao ličnost.*

*Fondacija me uči da se trud isplati, da dobrota uvijek ispliva te da od svojih snova nikad ne moramo odustati jer za sve postoji rješenje i svaki se tamni oblak može otkerati. Fondacija je zajedno s roditeljima temelj mog odrastanja, ljudskih vrijednosti koje sam stekla i koje svakodnevno učim.*

*Najveća pomoć koju sam mogla dobiti u toku školovanja jeste upravo od Fondacije Hastor.*

*Fondacija me je naučila da se trebamo truditi, boriti i snalaziti. Baš se osjetila neka čista ljubav.*

*Fondacija me je naučila da uvijek pomažem drugima, a volontiranje me je naučilo da saslušam druge ljude.*

*Jedan od najvrednijih aspekata ove stipendije je znati da u svakom kraju države imaš druga i pomoć u slučaju potrebe.*

*Hvala Fondaciji Hastor koja pomaže ljudima željnim znanja, jer znanje je jedino blago koje nosimo i koje nam niko ne može oduzeti.*

*Jednog dana bih voljela biti s druge strane Fondacije, da ja budem donator kako bih se bar na taj način zahvalila za sve učinjeno za mene i ostale stipendiste. No, do tada ću se truditi da na sav glas pričam o ovoj velikoj porodici i da je predstavljam u najboljem svjetlu!*

*Drago mi je što danas postoje ljudi kao što su predstavnici Fondacije, koji odaju pažnju i podršku mladim i perspektivnim ljudima i tako im pomažu u njihovom razvoju, u svakom smislu te riječi, a naročito na poljima kao što su obrazovanje i sport.*

*Za mene Fondacija Hastor ima veoma važnu ulogu, 10 godina mi je jedna od najvećih motivacija.*

*Fondacija Hastor je vratila moje samopozdanje i vjeru u sebe.*

*Fondacija Hastor omogućila mi je rad na sebi, sticanje novih iskustava i mogućnosti, upoznavanje novih ljudi, izlazak iz zone komfora i uveliko olakšava finansijsku situaciju mojih roditelja!*

*Fondacija mi je pomogla da upoznam divne ljude, dodatno usavršim svoje vještine i sposobnosti, da budem organizovana i steknem različita znanja tokom volontiranja.*

*Zahvaljujući Fondaciji ja sam uskoro magistar farmacije. Pored toga zahvaljujući stipendiji sam putovala, upoznala nove ljude i zasigurno mogu reci da sam ponosan član ove velike porodice.*

*Bez Fondacije Hastor ne znam da li bih uopšte bila na mjestu na kojem se nalazim trenutno. Studiram zaista ono što volim i Fondacija Hastor mi daje motivaciju da nastavim i da radim na sebi i na tome da budem što bolji student, što bolji kolega i što bolji čovjek.*

*Fondacija Hastor me potiče da konstantno radim na sebi i na ciljevima koje postavim u životu, jer „Obrazovanje - izbor pobjednika“.*



# Klub prijatelja

Kroz osamnaest godina svog postojanja Fondacija Hastor svakodnevno unapređuje svoje aktivnosti i djelovanje, a sve u cilju ulaganja u obrazovanje i izgradnje kvalitetnijeg i prosperitetnijeg bosanskohercegovačkog društva. Zahvaljujući angažmanu svih koji se svojim radom i djelom vežu za Fondaciju Hastor, prvenstveno njenog kolektiva, razvila se u najznačajniju i najveću fondaciju ove vrste na području Bosne i Hercegovine i regiona. U školskoj i akademskoj 2023/2024. godini, kada Fondacija ponosno broji više od 2.300 stipendista iz skoro cijele Bosne i Hercegovine, uz nju stoji mnoštvo prijatelja i donatora, pravnih i fizičkih lica, koji prepoznaju misiju Fondacije i aktivno je podržavaju. Svojom nesebičnom podrškom te odlukom da svoju društvenu odgovornost usmjere ka investiranju u obrazovanje, naši prijatelji i donatori čine mogućim dugoročnu misiju Fondacije Hastor s vjerom da pozitivne promjene u društvu i njegova svjetlija budućnost dolaze zajedničkim radom, znanjem i uspješnim školovanjem.



## VOLONTERI FONDACIJE HASTOR

Aganspahić Sead  
Ahmetović Edin  
Alagić Amir  
Alijagić Belma  
Bašić Nejra  
Broz Zoran  
Čivgin Nihad  
Dedić Amela  
Delić Sanel  
Dumanjić Samir  
Duraković Anela  
Đapo Haris  
Đonlagić Lejla  
Gagula Refija  
Gelić Irma  
Hadžić Marizela  
Hadžić Mehmedalija  
Hadžiselimović Eldin  
Hajdarević Dželila  
Hasanović Merima  
Hodžić Adnan  
Huseinović Šukrija  
Imamović Halima  
Jusufović Rasim  
Klapić Eldar  
Kučuk Adisa  
Kulo-Begić Emra  
Lagumdžija Jusufbegović Jasmina  
Lazović Nejla  
Manov Ismira  
Mekanić Šemsudin  
Merdić Alem  
Milinović Linda  
Morankić Feđa  
Moro Haris  
Musić Indira  
Mustafić Samir  
Nešust Semra  
Palić Safet  
Pašić Rabija  
Pulić Mirza  
Redžepović Aida  
Redžepović Samir  
Rizvo Marizela  
Sarajlić Haris  
Sarić Maida  
Sijahović Emina  
Šabanović-Kokot  
Almina  
Šehović Miralem  
Šesto Muniza  
Tahirović Jasmin  
Vuk Edina  
Vuković Hanifa  
Zulum Dženana

*... i neka nam ne zamjere mnogi drugi, trebalo bi nam još makar 50 stranica da napišemo svu ljubav i pozitivnu energiju koju dobijamo od svih naših volontera.*

# Pridružite nam se

Fondacija Hastor organizacija je koja punih 18 godina djeluje na području Bosne i Hercegovine tako što ulaže u obrazovanje djece i mladih, a posebno onih koji su marginalizirani zbog teškog socioekonomskog statusa i sredine u kojoj žive. U školskoj i akademskoj 2023/2024. godini Fondacija broji više od 2.300 osnovnoškolaca, srednjoškolaca i studenata koji su izabrali obrazovanje kao glavno oruđe za stvaranje svoga uspjeha i pokretanje svih velikih promjena unutar našeg društva. Pored materijalne pomoći stipendistima, nastojimo pružiti moralnu podršku i kontinuiranu motivaciju za dalje napredovanje i usavršavanje. Poučeni prethodnim iskustvima, poznanstva ostvarena tokom stipendiranja, nova iskustva i mnoštvo savjeta otvorili su još šire vrata ka kasnijem zaposlenju i novim životnim šansama. Zbog velikog broja aplikacija za stipendiju koje svakodnevno pristižu na adresu Fondacije, nažalost, neke se od njih moraju nerado odbiti i kroz vršenje selekcije izabrati najbolji od najboljih. Kako bismo svojoj velikoj porodici mogli pridružiti još više vrijednih i sposobnih mladih ljudi kojima je vjetar u leđa veoma potreban, i nama je potrebna podrška prijatelja koji s nama dijele istu viziju. Djelovanje Fondacije Hastor je usmjereno ka stvaranju stabilnijeg i perspektivnijeg bosanskohercegovačkog društva, koje se temelji na ispravnim vrijednostima i jednakim prilikama za sve, a u čijem se središtu nalazi sam proces obrazovanja i mladi ljudi.

***Ovim putem pozivamo sve pojedince, kompanije i organizacije da postanu dio Kluba prijatelja Fondacije Hastor i pomognu nam da veliki broj stipendista dobije priliku za uspješno obrazovanje tako što će na svojevrsan način doprinijeti osiguravanju finansijskih sredstava za stipendiranje djece i mladih širom Bosne i Hercegovine. Pridružite se našoj misiji i pomozite nam da zajedničkim snagama pokažemo da obrazovanje uistinu jeste izbor pobjednika!***

Ukoliko želite podržati rad Fondacije Hastor,  
uplatu donacije možete izvršiti na jedan od transakcijskih računa:

**ASA Banka dd** Sarajevo

1346101000825159

**Raiffeisen Bank BH dd** Sarajevo

1610000055230065

**Unicredit Bank dd** Sarajevo

3389002201775656



### **Upravni odbor**

Hadžiselimović Eldin, predsjednik  
Kučuk Adisa, članica  
Jusufović Rasim, član

### **Komisija za dodjelu stipendija**

Redžepović Samir, predsjednik  
Hadžić Mehmedalija, član  
Hodžić Adnan, član  
Huseinović Šukrija, član  
Morankić Feđa, član  
Planinčević Nermina, članica  
Vuk Edina, članica

### **Tim Fondacije Hastor**

Donlagić Lejla, direktorica  
Dedić Amela, menadžerica Odjela za obrazovanje i odgoj  
Kulo Begić Emra, koordinatorica Odjela za obrazovanje i odgoj  
Nešust Semra, saradnica za administraciju  
Klapić Eldar, administrativni asistent  
Sarić Maida, menadžerica Odjela za projekte, razvoj i promociju  
Šabanović-Kokot Almina, saradnica za projekte i edukaciju  
Zulum Dženana, saradnica za odnose s javnošću



**FONDACIJA**  
HASTOR